

四庫全書

集部

# 欽定四庫全書

集部

御定歷代賦彙補遺卷十九

二十九

詳校官檢討<sub>臣</sub>劉炘

主事銜<sub>臣</sub>徐以坤覆勘

總校官編修<sub>臣</sub>王燕緒

校對官助教<sub>臣</sub>汪錫魁

謄錄監生<sub>臣</sub>朱紱

欽定四庫全書

御定歷代賦彙補遺卷十九

行旅

北客賦

有序

宋趙奭之

北客宦遊巴楚歷三峽之險而抵永安故區地勢近瘴  
兩見盛夏官居民廬皆在山麓鑿地數百尺而不及泉  
故市無井里無醫客患之而勉同市人飲諸瀼水苦滓  
穢飲之澗谷而懼虺毒俄有老叟謂客曰漕府廉臺有

二井焉泉冽而甘盍往汲之客曰使者之庭闈人嚴守而應接有時甚非羈旅所敢妄干叟莞然而笑曰子胡不采之風謠質之行事善利濟衆初不禁也客於是拜其言感其意而往汲焉迨今逾年暑無瘴暘之苦而得以安居是使者之惠也輒賦其事而抒素云其辭曰北客伶俜陟彼崔嵬南游巴楚實仕於夔歷白帝之區域賊赤甲之嶮巖瞰濫潁之出沒峙瞿唐之巍巍觀楚國之絕塞悼蜀宮之故基客喟然歎曰昔窮兵百戰用

武之地也仰而無覩但見林莽蓊鬱岵岵峵峵巖巖雲獠  
烟霍霽一色三時豫和炎夏為厄逢辰久安用夏變貊  
歲襲連郭龍勢蛇跡官府民廬棧阜構麓八家無井而  
不能革客患之而同市人臨瀼津雜滓穢汲黃大瀰漚  
湔之流汨人精神乃訪屢屨之下臨嶙峋之曲千人挈  
壺百穴漱玉清清泠泠而冰敷雪沃未幾有叟呼於列  
曰子曾不知不毛之瀘自此塗出葶藶叢滋虺蝮潛匿  
炎毒之厲而是生百疾溪流可酌而中有沙蟲實大梁

之公子胡不自衛而反蹈其失客謀於叟為之奈何貧  
如顏回而有飲瓢之樂曠如孺子而有濯纓之歌叟豈  
能溉我以甘露濡其旱禾叟於是逡巡若避赧然變色  
僕游塵世安有神術知夫西有漕府東有廉臺方布天  
子之仁澤救民之旱灾烏能秘一縑之清潔坐視游子  
之炎埃客釋然解疑僕僕駁馳中消歛衽下氣以道使  
者之德音自云汲之引之周浹旁及而閭無夜閉雖負  
年以逝濯類抱甕而為隧請觀夫易卦曰井養不窮兮

收而勿幕又稽之老氏曰幾於道兮善利萬物散為四海之惠不止匹夫之恤噫鼯鼠飲河而不過滿腹鷦鷯巢林而不過一枝苟足各有其極雖多亦奚以為故蘭臺之風不及於甕牖而楚子作賦西江之水罔濟於輶鮒而波臣見譏客於是慨然感慨頽然下拜明既能哲佩以為戒信乎君子之淡以成久而不壞

南遊賦

明 田汝成

歲次闌茂月旅夷則歷日戊寅七夕令節田子將祗役

桂林藐焉異域戒行李辭嚴君展瑩宅謝姬姻供帳南  
浦弭楫西津迺喟然歎曰迢迢畏途險矣隘矣佻佻征  
夫厘矣憊矣夫運有窮通事有順逆安土敦仁謂之迪  
吉故度德量能中外以秩者君之制也委身陳力夷隘  
無擇者臣之義也猥經術之寡昧兮濫策名於盛時效  
涓埃於一紀兮倣沿牒而登資王程檄其孔棘兮誼不  
可乎稍留遂揚舠以遄往兮訊南紀而遠遊關庭闈之  
定省兮眷桑梓之綢繆雖慰親以強笑哀憑心其曷瘳



路尸饗而負米曾受杖於耆瓜尊叱馭以馳阪嶠絕裾  
而忘家伊數賢之異趣兮予惟三復乎白華景孔門之  
崇孝兮何百行之能加陟五雲以騁望兮散予心之鬱  
伊禹穴蔚其對漢兮微河洛而永思輯瑞帛以會計兮  
防風後而蒙誅孔斥怪而不語兮胡辨骨之專車俄瑤  
山之峩嶺兮突秋江之怒濤乍翱翔以徐進終跼蹐以  
彌高東赭峽而匄隘薄赤亭以消搖陵廣斥而雲布迫  
枝汜而熊咆來不知其所吐兮去莫測其所韜將堪輿

之噫吸兮疇胥怒之能招降層岑而即舸兮御魚浦之  
緒風淹定山以回眺兮盼鳳嶺於冥濛旦予發於浙汭  
夕倚櫂於桐廬斟文連以淪茗芼翠荇以爲茹山川鬱  
其盤飢兮信玄聖之儲胥攬予纓之纚纚兮濯嚴光之  
靈瀨晤入幕而輸忱曾不屈其鯁槩體肥遯以居貞處  
久約而能泰希巢許之遐踪何狂奴之故態指天末以  
西邁兮歷姑蔑之榛墟丁吳越之龍關兮悉索賦而從  
之踐茹膽以勗恚媼持葛以作絲藉蠡種之夾輔竟澡

恥於會稽何六十之庸敏復假虹於妖姬貴乎聖賢之  
持滿兮履薄冰以自持彼何怙而淫佚兮少康祀其忽  
諸悵覽古猶未厭兮增羈懷之永歎沂行颺以催發兮  
紛不假乎盤桓釋余橈於潑許揔余轡於常山路威夷  
兮木杪風飄蕭兮雲端感新秋之策策悲故國之漫漫  
望玉斗之幾峯驚鉛溪之修渚雲冉冉以歸吳人棲棲  
而泊楚亂彭蠡之汪洋兮康郎歸其在睹晒偽漢之草  
竊兮規潢池以跋扈皇祖赫以龍飛兮矇不肯乎為所

鼓蛙怒於鯨波灰萬艦於一炬先扶搖於鷹搏後倉皇  
以鼠沮屬四寓之承平兮杭一葦以安流帆翩翩兮賈  
客眾濺濺兮漁舟零杜蘅兮幽淑狎鳬鴈兮中洲沐膏  
澤而詠勤苦兮喟太息以夷猶會長風以鵠舉聊戢翼  
於洪都肅南州之高士吊黃壚以東芻蕃秉釣而少通  
兮矯矯節於顏波既下榻以承間兮胡不規之以中和  
處明夷而用晦兮知其無可奈何也互標榜以危言兮亦  
吾黨之過也誦古牒其多愍兮予姑順途以徜徉披劒

池之荒壤睇牛斗之餘光金川洌以維緩玉筍駿以高  
驤慨神物之恍惚兮仙之跡復已渺茫握椒醕而叩螺  
阜兮謁忠節之祠宮嘉趙宋之多士兮每登庸乎茲邦  
文子哀然而首舉兮值宗社之顛傾慟赤縣之草莽扶  
黃屋於滄溟靈亦知天壤之不可支兮要長弘以為正  
竭余力始就繫兮濱九死而崢嶸誓成仁而取義兮佩  
聖訓之孔明復靈歌以激烈兮涕淫淫其緣纓犯皇恐  
余上涖兮亦靈顛沛之所履水瀉瀑以下瀨兮擊危磯

之齒齒類驔馬之騰波象潛牛之伏渚沫沸沸兮霑衣  
風冷冷兮送予將感靈而助予兮瞥予濟乎驚湍予既  
不難於利涉兮履習坎而愈安晞庾嶺之偃蹇兮路回  
回以造天石側疊以霞駭木天矯以蚪蟠憩中路而神  
掉俯浚谷以顛朴豁崇闕以紺閭兮嚴不可乎徑度通  
重海以來庭納八蠻之實賦輦犀象而甌珠翠兮歸上  
國而布濩嗟曲江之人傑兮煒相業於開元闢茲闕以  
懷遠兮峻故里之藩垣衣冠儼其世祀兮覽遺編而增

歎賦白羽以寄諷兮窺細德之險微予之言既艱於納  
牖兮抱殷憂於長離板上帝以喪亂兮悔違弼其何追  
乘凌江而下溯兮接南海之洪波憶當年之浪跡兮冒  
赫義以流槎涉朱垠之浩沔跋赤嶠之嵯峨疲精神於  
夙夜兮冀青衿之速化遵半途而削迹兮雖式穀其則  
那予亦知迂疎之為患兮耿憤世而嫉邪雖忤時以多  
口兮剖心腎其無他掠端州以左轉兮訊孝肅之遺黎  
却片石而弗橐兮孰貪泉之能溜潯江流離而東下兮

蹇予舟以薄磷梧山龍從以隗隤兮路陂陀而逾峻逆  
離水以上浮兮入大荒之脩垌山參差以繚繞兮冗不  
知其所名峯刺天兮戟立灘澹石兮雷轟霧霏對以下  
浥雲瀟渤以長蒸猩猿哀以夜嘯虎豹羣而晝行劃綠  
林以唐突兮孰有戎之敢撓何茲川之塞阨兮餘百里  
而無人心屏營兮逾劇途遭迴兮益屯禹胼胝以荒度  
兮曠戎索而弗理降半楚以肇封兮輓輶路以略啟王  
制閭而未被兮詎文德之能救忍羈旅以伶俜兮惕二



親之遺體超陽朔而北詣兮及桂林之崇墉控五嶺之  
上游兮鎮百粵而為邦洞重閭以方軌兮壯屏翰之軍  
容其中則朱門赫艷文薨鉤閩植戟鳴鐘皇宗是國次  
則街衢弦直閭閻蟬聯五方服賈列隊居廛扶輿毓秀  
綏冕比肩於前則連山峭崿界以重江醜清瀉濁環陰  
抱陽經涂枝術貫穿越裳扼要領而南下若建瓴於穹  
堂於後則培以衡嶽枕以堯阜綸絡荆潭盤宗篤厚九  
疑續紛以布翼三湘迴帶以澄瀏於西則山奔水導分

湘別灘發源月竈莫測端倪引牂牁之洪派委下屬於  
番禺於東則兩江迤邐與海通波飛艘絡繹鬻販魚鮓  
泮散夷落北走湘湖巡四郊而容與兮庶斯域之可居  
鄉心愒其勃發兮衷眩曜其猶初佐旬宣以賦命兮媿  
實約而名虛駑駘駕而戀槐兮思抱影於空廬遠父母  
而弗穀兮陟岵岵而連如孰有翼之可假兮願一覲夫  
里閭魂展轉以達旦兮宦情索其日淡乞骸骨而返初  
服兮疏欲陳而未敢擇官而仕豈臣心兮顧私衷之寡

歡傾肝膽而孰諒兮叢謫罍子以避難第抑志以就列  
兮順時命而即安奉簡書以從事兮又怵瘵曠之為患  
亂曰大易有訓幼所懷兮消息盈虛與時偕兮困亨而  
貞反諸已兮永終知敝慎厥始兮死生富貴命在天兮  
釋躁寡怨維永年兮達人大觀眇四海兮雄飛雌伏安  
以待兮欣戚異感途所經兮歌以永言舒旅情兮忠信  
篤敬慎修身兮雖之夷狄終無尤兮

導南賦

有序

明  
梅鼎祚

歲壬申秋九月余征於南蓋予齡冠矣行所睹記多六  
代遺蹟可弔而歌謠其泰者足用訓至相嬪而不還踵  
亦憮其多故焉周之鎬豐今在斯矣顧瞻之暇稍韻其  
事什伍竊放昔人述行而賦遵南如其鴻麗闊達以汙  
德頌勛則班揚張左之業非是賦本指余病未能賦曰  
余嬰世之弗豫兮痺蒙昏而寡儔何緒采之委錯兮裹  
混濁而離憂洞中冥而延過兮締詰符於遠遊寅厥蓋  
而疊疊兮紹協思於舊京戒僕夫以中夜兮肅嚴駕而

晨征惟密親之臚疵而怫鬱兮步盈軒以自虞相婦處  
之多吝兮酌作氣於懸弧撰良辰而云猶兮遂躡屨而  
南徂鼉祝轅於宛止兮夕余濟於邇城遵大遠而旋顧  
兮望黃池之淦滙彼衆潤其攸同兮象景霽而謚清時  
秋氣篤於萑葦兮款緒風於素林路曼曼而超邁兮旌  
搖搖而曲張躋青岑以登頓兮存謝史之遺宮徑迴鑿  
而宵阻兮宿莽翳而弗陽委千秋於玄夜兮寄遙思於  
予鄉騎跼跼而更御兮從微微而在後軫轉其道兮問

膜功於東晦歎大浸洋溢而羣飛兮宿腓草於畝首固  
天留之流行兮亦國家所代有豈藿食之能謀兮願陳  
情於牧守引姑孰而胥眺兮相石城以如環曰楚封之  
匪遐兮究南霸於造端領皇風於東晉兮尚司馬之維  
翰躡黃阜之峨峨兮介凌歊其以軒討遺音於白紵兮  
謫志譽於龍山忿處仲之逆祐兮弔蘇子之不咸昔戴  
威而滿頭兮竟提禍以撝撝維長綃於牛渚兮聞水族  
之多奇抑神鼎所未備兮孰然犀而照之厥幽明之永

絕兮何所當而要期反予駕於長坂望枯園而容喬陟  
葛陽之修嶺考慈姥之故地形嶮巖而迤嶓外儻莽以  
優邁託鐘籠於其巔兮得簫管之上器日晡靄其將下  
兮指新林以取塗茂出與而舒疊兮遂將車而入虛何  
纍纍之相似兮無松楸以植塋匪京觀而若斯兮迺鬼  
雄之孤墳昔島夷之狂戾兮數取贏於一伍短兵接以  
當目兮躡余行而若僂馬就括而飲又兮化甲卒於原  
塹中自瘞而繚轉兮或益恤而永乖願藏心於淵兮累

軫慮以儻回蹇吾去此故土兮偏何遲而歷茲尚由庚  
以舒筴兮涉長淮之浩流慨秦金之沈隱兮虛厭勝於  
東游過新亭而隕涕兮惜晉業之不邁結予轡於四望  
兮且弭節乎石頭審虎踞之曲勢兮歎防禦之阻脩臨  
段石之岑峩兮觀石碣而志功入三山而郁郁兮何所  
建之偉鴻寥閭閻之千肆兮羅士女於五方嘻噓氣而  
成雲兮市隧別而開通噫行流而盤魄兮既娛樂而且  
康華貨殖以聞委兮冠蓋鬱而霜集何豪游之元物兮



設雄觀以萬國被郊垌之四分兮當星紀於上極相承  
覽以尸存兮恢眈眈其難悉率越城而喑噤兮追孫氏  
之所規蹈太初而容與兮放赤烏以委蛇荒楚楚而莫  
蹟兮邈蓁蓁而無蹊昭石印之詩妖兮安天塹之足恃  
亦懷土之厚固兮寧食水而之死胡詭命而豐淫兮尚  
聽咎而室耳彼龍游而渡江兮覆厥族而何譏發臺城  
之南端兮爰思隸於嘉和越披香與五明兮聞靡麗之  
實多擢曜靈以中處兮列望僊其與璿儀傭鬼工而猶

厖兮極人巧其靡加中又實之以要眇兮二八射代而  
脩媚觴玉樹以行謠兮金承跌於蕤砌忽眇眇以徊遑  
兮疑乍虧而互蔽謂恢然之嘉觀兮劇將以明得意逮  
天懟以霽怒兮地永莽而閱世予既曠長懷而遐眷兮  
復容與乎壽宮載雲旗之冉冉兮肆路轂之彭彭布几  
筵於下瞰兮儼靈君之子降觀峻宇之猗猗兮規化城  
而特起紛膠盭於菴羅兮紆旁唐之玉妃帝釋之容容  
而遙集兮祥河涌而輟水尋智囊於支郎兮衍白麓之

名理擣魔鬼其馬誣兮釋大寶而殉之蔣骨青而死神  
兮國將亡則聽之繇永昌之二日兮讖泉行以九百臨  
高臺以駐足兮火酣酣於城北厯六代之代行兮不畢  
輪而易居豈據執之不預兮實伊德之道馮天監此下  
土兮篤淮甸而龍興雷震震而若奮兮超采石以東南  
雖九隩其奄宅兮睠馴首於鎬豐遺洛食於嗣聖兮因  
輓輅而跡關中順陰陽以履極兮吹象形於紫微狹漢  
制而循周兮言彬彬而庶幾雙闕立表以巘嵒兮闢大

夏而奠維抗高門於閭闔兮右帶江以周池廓夷塗而  
丹堊兮辟荔均而桂衡重襲固以城平兮洞轆轤兮其  
無垠增九筵之垞圯而博敞兮迤緒綺錯以綢綸辟衆  
星之拱極兮若燭陰之舒明宛雄虹之繚紹兮交風雨  
以相承神靈協而環衛兮固並建而彌新佇景望而懷  
息兮邈鼎成於軒帝大期集而升中兮肅鍾陵其永闕  
錡三泉之已汰兮酌流水以約制慌金支其開闔兮倏  
潛舉夫玉衣穆皇皇而假廟兮儼陟降以昭回樂斯丘

之委夷兮式序類於文謨保厥功於百世兮觀河洛而  
締思謀美美以上陵兮躋覆舟之在阿臨夸術之廣廣  
兮淒玄水之微風焱起於蘋末兮施白露於蕪葭遭吾  
道以北首兮酹列帝之寢園椒塗穴於狐兔兮膺牧豎  
之秦原昔千騎而從風兮鬼何窈窕而予前物有所必  
至兮時有固然經川隰而周覽兮投翰其焉可詳循徵  
祖於華林兮期再會於半陽籍王謝於烏衣兮諒溫尹  
之伐庸曲周生之匪貞兮卬卞氏之純忠邀三弄於清

漢兮壯賭墅之捷肥隱典午之淪胥兮疇斯人其焉依  
緬遐想於冶城兮悠然安知其所衷倆秦淮而東直兮  
披郊園之榛中屬雌蜺之連蜷兮信休文之所考字康  
樂以其坊兮睇平原之舊墟放微志於山居兮邈延佇  
於吾廬何明哲之寡營兮由不密以失身遙信譽於風  
菌兮遲寸晷於鶴音聲無翼而蜚蜚兮不救死於其頸  
予哀抑而茆薄兮非修短之足愍蜩蟬厲而沸秋兮霜  
既零而木下復改策南之郭兮祖蹟靈其在宇紛炳臂

其蕭兮神哉沛而鴻祐思媒勞而弗終兮引天闕以流  
睇稽我武之肆狩兮茲承庥於游豫喬桓桓而司馬兮  
逕跋涉於天步瞰河山之保界兮擘帶礪其與盟撫魏  
鄂之丕緒兮偉曹黔之飲勛馮末照於容光兮道開天  
而軼賊名履高平而顧問兮衆轂擊以成雲第宅縱以  
相望兮出清蹕而若神日佯佯其諷議兮時耀首而膏  
脣寧疾歌以牛下兮粲燭火之星難鴻遼遼其未央兮  
冀異州之上賢輕微命於尚臬兮中抱慚而含隱有仇

離而吸泣兮神宇漠而棲憤援桂枝以招招兮揚不流  
於東楚天地際而往復兮尚德載而既雨信服膺以修  
嫩兮何曾思其顛顛廓獨處而不懌兮軫芸芸之盛年  
希階天而不愆兮予胡為此邦赧童觀於素朝兮誓將  
旋予舊疆遡回風而反顧兮豈我心之則降亂曰天地  
升降紛相襲兮修折之運焉可極兮習坎乘流與時息  
兮君子於行其儀一分其儀一分南之征吉兮

南歸賦

有序

明  
謝肇淛



萬厯辛寅之春予以屯田持節歸里水陸南北七千里  
餘其始發也楊柳未華及至三出蟋蟀居壁賸客途之  
迢遞感物華之變遷聊述所見悲喜之情以當勞者之  
歌云爾其詞曰

春莫兮日良秣予馬兮郊之陽僕夫兮抗旌紛眇眇兮  
祖張樂六騏以先路兮賸故都而彷徨橫玉柱以割涕  
兮沾原隰之皇皇於是厲潞河憇黍谷徑燕津輟涿鹿  
金臺為郊易水猶綠風蕭蕭兮送寒水鳴鳴兮如哭悵

英雄兮何之空遺恨兮擊筑維時青陽弭蓋朱方載御  
殘星動野薰颺拂曙草霍靡以承輪花歲蕤而隱輅榆  
瑟瑟兮隨錢柳絲絲兮舞絮絮征鴻之嘹唳兮胡違和  
而北蕭紛江蘼與修芷兮恐年歲之遲暮驅吾車兮兩  
河風冥冥兮吹沙麥秀兮漸漸鳥覓覓兮和歌望平原  
兮遙遙莽平楚兮蒹葭日冉冉兮濛汜稅吾駕兮齊之  
阿若乃秦碑既泐魯殿未改高臺就夷荒城猶在南樓  
縱目浮雲掩靄異代精靈為桑為海迨夫濟漯南道汶

泗西微洑流初淪呂梁載連既創巨而圖細亦逃坎而  
趨夷石碓磽而下齧山崒岼以旁圍雖建瓴而東注或  
一泄而無遺水門宵鎖雲帆晨飛乍乘駛以走坂時失  
水而塗泥川原負兮飛鳥絕莽蒼暗兮人烟稀雲慘慘  
兮虎嘯雨濛濛兮梟啼晨火斷兮銚冷瓶粟罄兮徂饑  
戒明發兮不寐悵畏途兮何之乃遵黃淮雙流合奔天  
吳激浪馮夷噓雲渦鎖騰掣地軸爭翻曜靈東吐玄闕  
西吞飛沫千里白日為昏縱一葦之所如汎汎兮萍飄

忽而無根彼圮橋之遺履兮身帝師而彌尊感王孫於  
一飯兮懷千金而報恩何二賢之馳騁兮卒同際而異  
門眷敝屣而遭迴兮高鳥盡而始寃苟吾冠之未挂兮  
又何為檻縲於垢氛俯千秋而灑泪兮邈共盡其何言  
清淮既濟達於廣陵和風送漿微波不興滌邵伯之遺  
堞擊楊子之洪砮錦帆烟滅離宮土崩玉觀墟兮瓊花  
盡迷樓塲兮荒烟凝銀濤萬馬而澎湃金山一柱而嵒  
峻豚涌波而晝霧鼉吐眼而宵燈蜃幻市以滅沒鯨鼓

幟以翮暫擊中流之樹影兮風為馭而虛為憑紛南北  
之風塵兮輪蹄擾擾而未寧彼天塹之安流兮或一葦  
而可乘噫世路之瀕洞兮扇微波而掀騰衆女疾予之  
娥眉兮矧重之以修能逐飛鴻之冥冥兮矢亡慕於繳  
繒乃遵毘陵沿具區道錫麓望姑胥潮通震澤城抱闔  
廬悵霸圖之不卒弔忠魂其未舒金精騰而嘯虎寶業  
冷而棲烏香牒黃壤琴臺綠蕪空宮游鹿虛廊穴孤只  
今惟有西江月長照征帆下太湖若夫淼淼離離瀟瀟

淅淅噴雷浴天盪雲沃日西控三江東奔大澤七十二  
峯黛螺浮碧黃蘆紫芙蓉紅蓼白芍鱸膾四腮蟹螯雙擘  
尖頭刺雞魚首銜石蔗漿杏糜菖苗芙蓉蜃蛤蜊蝦鱗  
鰓鰔鰕莫不呈鮮登筵擅雋入席留舌為腴沁齒生液  
恍海錯分故鄉欣一飭而共適於是青翰矯翼彩鷁迅  
羽榜師擊汰僊人伐鼓攬槁李之故墟靄曾樓於烟雨  
香銷秦逕魂斷鴛渚倚語兒兮孤亭懷美人兮蘿葍豔  
骨忠魂謀臣霸主飲恨吞聲同歸黃土至若吳山東峙

平湖西紫峯飛鷺嶺泉涌龍泓六橋柳色九里松聲壁  
車聽馬畫舸朱鈴絳脣紅袖錦瑟銀箏香塵霧合歌吹  
雷轟感南渡之遺事攷蘇白之所營何經始之盛美兮  
卒湛惑而用傾望思陵之玉盃兮寄遺恨於丹青紛素  
車與白馬兮歛嘽嘽其如雷霆雪山涌而東注兮莽似  
神而難名胡鵠夷之雄魄兮避疆弩而西行噫大塊之  
一氣兮固橐籥而縮盈朝息予駕於富春兮夕艤掉於  
嚴陵奔湍怒以叱咤兮硯磊齧而厯崩呼邪許以蹭蹬

兮飛百丈之縻絙惡南風之五兩兮羌竭蹶而難勝彼  
得時而騁駕兮疇無階而可升眷山椒之片石兮繫予  
慙於客星爾乃丹壁硤研蒼洞黝儵層灘咽號重岡合  
束劒稜攢峯練花飛瀑堪巖凹堂迴渦旋狀細雨晴飛  
慄風夏謖亞枝掠牕枌藤捲屋積潦增波衆籟鳴谷沫  
濺城腰浪躍山腹石卵疊沙漿牙宵竹漁罾斷流樵唱  
被麓碓借水而自舂筏銜燈而還燭雞棲埒而掩茅犢  
出山而收穀信吾生之有涯羨一丘之已足於是淅溪



東窮楚岫南峙雲樞卸裝筍興導軌羊腸九曲以組垂  
龍背千盤而標起資施蒼蔚霍霍對列施霓徑連蜺雲根  
倚旒泉界道以飛素山銜曜而凝紫野雞號兮林月斜  
驛馬嘶兮酸風起零雨兮遙遙木葉下兮薜蘿死乃度  
分水載瞻載馳灘聲鳴咽闕樹依稀霞舒幔以絢采石  
折筍而昇曦橋沉虹於漢表簾噴雪於峯屈玉簡曳金  
以璀璨寶藏函縹而紛披蛾眉慵兮臺鏡老蟬蛻冷兮  
龕苔滋丹崖秋兮舟楫朽鐵笛怨兮猿鶴悲盼仙踪之

杳邈兮悵吾衣之已緇嗟王事之靡盬兮寧今是而昨  
非馮一舸於輕湍兮駢晨風之驚飛迴石罅以出沒兮  
倏奔電而莫追弔陽侯於建安兮城郭是而民稀望鐔  
津之紫氣兮胡竟合而中離扣困溪之嚴關兮榜人告  
余以岵夷邈乎江之落潮兮漿咿嘸而隨之睇粉榆之  
百雉兮意似是而復疑鬱三山之雄壘兮吾猶恐夢魂  
之幻為欣稚子之候門兮爰破涕而解頤於時長羸既  
季溫風扇和翠旗動蕙綠蓋舒荷三逕未荒穰陰載多

高臺擎露曲池影娥竹抽寒玉松老霜柯石斑剝以繡  
鮮壁糾結而蟠蘿蜩嘒嘒於高柳鱗初躍於澄波眷六  
合之清朗兮奉板輿而相過挹清芬以盈把兮覩朱顏  
之微酡惜此日之不再得兮舞爛斑而揚歌歌曰南山  
有廬可以棲遲河之洋洋我舟既維人生行樂爾須富  
貴何時苟余心之無營又安知檣榆之與天池

東歸賦

明鄭明選

余髫髻而諷詩書兮嗽六藝之芳津竊鄉曲之諛聞兮

利觀國而上賓舉鄉書於弱冠兮遂坎壈而逡巡屢計  
偕於南宮兮蹇余馬而迴輪淹中年而鵬奮兮肇服政  
於安仁綰墨綬之若若兮畏應宿之非人余諒不能踵  
彼宓子兮竊希蹤乎戴月垂五期而罔效兮夫何心勞  
而政拙聖皇既不余譴兮又徵余於秣陵蹠黃門而翔  
青瑣兮陪西曹於掖庭帝曰汝為耳目兮庶弼諧以謨  
明又投我以艱大兮典七萃於三營閱鵠鶴之變化兮  
簡百鍊之精兵邇時事之多虞兮憂忉忉以中怔豈不

懷汲魏之高躅兮莫達吾之精誠諒負乘之匪器兮詠  
伐檀而內慙登石城而侘傺兮曷不返余之初服覲北  
山之崩劣兮恐移文之余辱數與志適相遇兮俄遘疾  
而彌篤軫受使而秦思兮烏沉疴而越吟彼孤貉尚首  
其丘窟兮孰伊人之無心叩天閭以乞骸兮逝將還吾  
故林帝心愍我小臣兮縱微軀以抽簪欣景命之生還  
兮理桂楫於江湄睇長江之晶漾兮渺浩浩以瀰瀰日  
既中而西淪兮潮乍至而東歸感進退之有數兮物無

滿而不虧擁江淮之險固環萬雉之金墉兮挾龍虎而  
盤踞三吳鑰其東門兮荆蜀闔其西戶非真人孰能都  
此天府兮豈六朝之能據王氣鬱以葱葱兮極吾目於  
孝陵仰神靈其如在兮悵欲去而不能孔去魯而遲遲  
兮軻宿畫而不行聊徐徊以夷猶兮孰察余之中  
情兩儀二曜既若是其幹運兮嗟物序之遞更會  
月離於南箕兮颺感栗而颺飄陽侯盱睢燦以怒兮天  
吳驤首以趨趙中流闐其無人兮鱗鼓浪以旬旬思臨

深之有戒兮余安敢乎過征縲余舟於燕磯兮騁余目  
於郊闕指直瀆而輾祖龍兮誕望氣於東南發赭衣之  
胥靡兮紛絕地而開山逞虎視而蠶食兮據上游於殽  
函任斯高以播虐兮隱黔首之傷殘子嬰歟以面縛兮  
歸百二於龍顏望牛渚之洪濤兮噴澎湃以砰礚謝微  
服以宵游兮泛素月而擊汰宏慷慨以詠史兮發歌聲  
之清會歡邂逅以同舟兮語申旦而不寐嗟知音之實  
稀兮迺締交於傾蓋睨采石之斷鰲兮慕青蓮之丰神

被宮錦以煥爛兮傲四顧其無人憾貂璫之月錦兮蒙  
挫衄於太真夜郎飄以遠窺兮胡才豐而命屯訪丘隴  
於青山兮惟葛藟與荆榛晁風濟而揚舲兮夕吾逗於  
真州胥挾弓以逃吳兮茲濟江而亂流遭擊絮之嫵女  
兮發簞飯以相周戒壺漿之勿露兮思追騎之我求女  
自沉以滅口兮從宓妃以遨遊雖慷慨以赴義兮亦輕  
生之足尤鼻采鑄於銅山兮金錢物於九野首開釁於  
爭博兮載裂眚於削土連菑川而結濟南兮引二膠而



糾趙楚面几杖之寬仁兮仰射天其何補竟獸挺而鼠  
竄兮身與首而異所南吾覲彼句曲兮抗薄天之高峰  
標洞天於道錄兮緬仙聖之所鍾懷三茅之靈宅兮企  
二許之玄蹤華陽黜以康宸兮闕玉簡與金龍嗟余嬰  
此沉痾兮希至道而莫從俄厯舟於金山兮聳孤秀於  
江之門水淘山而不動兮山遏水而彌奔龍池激濫而  
上浮兮鵲峰硤礫而後蹲化塔耀日以矐睽兮琳宮躍  
波而吐吞汲中冷之靈泉兮信水晶之獨尊焦岷嶽以

對峙兮嘉逸民之肥遁丁炎精之式微兮獨泥蟠而無  
悶凌霜雪以袒露兮雖焚廬而不困躡赤霞於物表兮  
詎軒冕之足溷余何為乎偏側兮臨遺廟而心懣並鐵  
甕以結纜兮吾將馳目於南徐陟北固之巋危兮命僕  
夫以腰輿狼石怒而欲立兮懷兩賢之躊躇操提兵以  
東下兮何樓櫓之紛如痛組甲之百萬兮瞥灰滅而無  
餘余既窮江行而入雲陽兮悼齊梁之陵墓金牛巉崿  
其尚存兮石麟湮滅而莫覩呂城化為林薄兮都壘寔

於狐兔惟是王公貴人兮偕草木以物故冀榮名之終  
古兮曾不得埒於朝露指毘陵以進道兮翳秦伯之故  
都曰翦商其非義兮蓋屏跡於海隅抗三讓之高節兮  
違幽岐而竄勾吳豈不醜劉髮而鄙文蛇兮與魚鼈而  
為徒苟求仁其得仁兮亦何陋乎蠻貊札能承此先德  
兮輕千乘於敝屣願附節於子臧兮羶何為而及已魯  
審音以知樂兮齊葬子而叶禮脫縞帶以定交兮解寶  
劍而酬死宣聖為之太息兮款有吳之君子瞻春申之

祠屋兮洵義重而功高却秦兵而歸楚質兮封吳邑以  
報勞濬申浦之水澤兮發黃田之土膏城郭既已圯兮  
賓客又已彫雲掩曖於慧山兮髣髴乎俠氣之未消虎  
丘宛其在前兮封闔廬之玄宮冶銅槨以為錮兮翮玉  
鳬之翺翔上有劍池之崩峭兮下有扁諸與魚腸雖塵  
埋於九壤兮猶熠燿以騰光虎一去而不守兮弔伯業  
之茫茫迤邐放乎閭門兮駭列肆之鱗鱗商賈紛其如  
雲兮窮水陸之奇珍粥江珠於淵客兮輸海布於實人

人雜還以摩肩兮騎凌亂而揚塵冠東南之奢汰兮孰  
返朴而還淳尋玉女之高墳兮既惆悵而芒忽恥蒸魚  
之見辱兮哀朱顏之殞越攜金鼎而同埋兮佩珠襦而  
共沒鶴舞市而鷓鴣兮殲生人而殉死骨湛盧憤而夜  
飛兮感神物之超忽眇重閨之峨峨兮喟夫差之昌披  
左既擁夫鄭旦兮右抱以西施謂款段為速兮謂雞斯  
為遲忘六千之越甲兮徒爭長於黃池嚼龍稻而三呼  
兮固雖悔而易追五湖綿亘於三州兮稟咸池之靈氣

山錯落以星布兮出沒於波濤者七十有二洞庭巋然  
最高兮夾東西而雙峙禹胼胝而底定兮垂明德於萬  
祀探林屋之金簡兮亦徒聞乎牒記眺鱸鄉之高亭兮  
復縱櫂於吳淞三江揚沸以散雪兮飛梁蜿蜒而垂虹  
胡烏喙之猜忌兮蠱變名而徂東祖計然之餘策兮託  
廢著於齊邦三散金於親族兮杳不知其所終越鶯脰  
之重湖兮盼舊鄉之咫尺久羈旅而無聊兮歸心近而  
愈急趣黃頭以齊榜兮曾不可以終日見似人而猶喜

兮矧吾還乎故宅山歛容以要余兮樹依依而如昔親  
戚候於道路兮慨余容之枯瘠雖申之以慰藉兮終握  
手而心惻城郭非吾所樂處兮爰屏跡於衡山負翠巘  
以為障兮周碧溪以為環既息肩而弛擔兮與世事而  
相捐傍漢陰以抱甕兮避於陵而灌園歲魚羔以供伏  
臘兮輸餘稅於薄田玩義文之奧旨兮誦蒙莊之寓言  
守恬淡以無為兮采衆妙於玄玄苟二仲之不我遐兮  
聊相與乎倘佯或抱膝以舒嘯兮酌麥醴而無荒夫孰

知拘拘之為苦兮吾將委運於彼蒼內惟余之涼德兮  
固福過而災生悟四大之假合兮雖疾病其何傷毅高  
門而內熱兮躬攝生而外戕匪人力之可營兮將何去  
而何從齊天地於一指兮會空色於兩忘抱清靜以獨  
立兮超萬古而久長

南觀賦

有序

明

田藝蘅

觀之時義大矣哉易曰大觀在上下觀而化是以二三  
以童闕見譏九四以用賓致美良有已也况人文化成



小畜懿德又君子之所有事者乎余宿鄙丘樊幼厯湖海再客白下遂作南觀賦焉賦曰

已未之冬陽生之月田子應聘修文遊橈將發指金陵而遐征寶龍飛之舊闕於是囊短劔束祕書乘符傳辭郊墟艤北闕而待渡富水衡之權儲資國課於商賈嚴緡算於舟車感古者之不征何後世而侵漁始作侑於壘斷終貽禍於河渠惟聖王能崇乎節儉斯窮旅皆悅乎行居迺揚舫於通津兮瞻臯亭之峻極拱龍鳳於錢

塘兮賴茲山之阨塞慨南宋之陽九兮駐旌旗於叢棘  
觀壁忽其出降兮甘辱身而亡國挂清醜於塘棲兮泊  
殘月於崇德雞犬荒而悲鳴兮人民散而菜色丁海防  
之廢弛兮縱島夷於邦域既復隍而屠邑兮孰能殉乎  
社稷石門鎮破秀氣橋危吊宗公之孤節想將軍之雄  
姿捐軀死戰絕糧覆師烈哉壯士巍乎新祠方皇祖之  
龍鬬兮士誠曾於此乎輿尸何天兵之威猛兮俘六萬  
之吳兒固仁者之無敵兮亦開平之玄機苟攻守之有

制分雖衆寡其何為豈人謀之不臧兮抑天運之盛衰  
經萬壽之小山兮為春秋之樛李當吳越之紛爭兮干  
戈日以披靡畫語溪以正疆兮亭柴辟於長水卒臣妾  
其魚肉兮奚脣齒之足恃臨嘉禾之舊館兮登烟雨之  
虛樓汎鴛湖而澄慮步龍橋以解愁訪死亭之故灣榜  
人道余以寒湫笑丈夫之未際兮為妻妾之所羞既忍  
辱於負薪兮又何恥於歌謳俄除道於會稽兮悔覆水  
之難收賢敗絮之嘉匹兮懷薄笨之好速望松陵以扣

舡兮傍垂虹而救楫懷神禹之荒度兮立功於焉而始  
集駭震澤之底定兮由三江之既入拯下民於魚鼈兮  
瑞帛紛其來輯仰三忠與三高兮出處邈乎其莫及眈  
鱸鄉之孤亭兮清風瑟瑟如其可挹晨雞鳴於練瀆夜烏  
啼於姑蘇賢太伯之三讓逃文身而建都歎麋鹿之荒  
臺招西施於五湖弔子胥之屬鏤訪伯鸞於吳趨方懷  
古其未已兮省近事於周吳元祚統其不綱兮咸揭竿  
而長呼何么麼之張四兮亦蟻聚夫鹽徒睨神器而不

量兮儼南面而稱孤煩王師之再下兮宗社卒以就屠  
信天命之有歸兮終混一乎輿圖亦有蹲虎之丘走狗  
之苑石池水陰長洲日晚許墅之關未開寒山之鐘已  
遠復稅及於艘艍盍嗟客行之偃蹇迎寒潮於無錫寶  
勾吳之始封在漢初而金殫固無事乎崇墉晒天祐之  
竊據假虎翼於元兇過延陵之故墟仰季子之芳烈紹  
至德於宗賢附高節於往哲欲挂劒於荒丘痛知音之  
久絕朝發毘陵兮夕宿呂城依然頽垣兮雄哉子明遇

孟津之橫流分為京口之要營觀海夷之殘破分追千  
載而傷情捨筏丹陽攬轡句曲山川平行原野膏沃豁  
我塵襟攄我曠矚禮茅山之白雲想三君之如玉雲陽  
古驛高橋廣阡古之建業今之應天湖海內控江淮外  
連列吳蜀為門戶殿閩廣為市廛龍虎蟠踞分武侯已  
發其秘經營根本分道子足知其玄是以禹貢維揚州  
之域天文實斗野之躔楚威埋金以鎮其地秦始鑿山  
以通其川孫吳成鼎足之勢東晉續永嘉之傳六朝因

之而迭霸南唐據之而偏安迨乎至元之革命始洩王  
氣於千年方我太祖皇帝之龍興也奮濠梁下采石克  
太平延儒碩首納陶安之謀遂成定鼎之策惟大是圖  
非中是宅惟重是居斯輕是役奠燕翼之不基朝侯王  
之嘉璧蓋繼天立極者三十有五年而聖子神孫復遷  
於燕陌也兩京並建留都實隆在殷維亳在周維豐郊  
壇陵廟舊內故宮隱隱脈脈鬱鬱葱葱衛以百司鎮以  
上公允文允武自西自東其中則天市三垣紫微帝室

玉殿屯霞朱門映日御溝融融苑樹秩秩龍漏深沉魚  
鑰秘密其次則直廬星拱翼衛雲翔貂蟬奕葉綬冕輝  
煌街衢坦直祠宇低昂珍藏四裔族間五房其南則帶  
以長淮峙以牛首朱衣秦開雙闕天剖向陽明以照臨  
享百粵之奔走其北則涵以玄武枕以鍾山黑龍隱躍  
玉澗潺湲會岷峨之督脈掉虵尾於荆蠻其東則赤山  
龍從婁湖汪濊瀾接滄溟根連泰岱擎三吳於左肱悅  
神烈之攸在其西則石頭險固大江靈長百二天塹千



里金湯馳桐柏而一瀉砥金焦而相望遵山河而膠流  
兮固美哉之天府總鴻纖之規畫兮皆聖謨之藻斧風  
流文物蔚乎其未泯兮獨冠映乎今古慶小臣之南征  
兮昭日月以狂瞽凌晨風而排閭闔兮臨管窺於寰宇  
亂曰幼志超軼在蓬桑兮弱冠遠遊眇四方兮使於金  
陵懿文章兮跋涉險阻感興亡兮王猷伯略兩茫茫兮  
登高斯賦比興長兮君子尚賓觀國光兮大鵬圖南聊  
相羊兮

航海賦

明 蕭崇業

句町癡人奉命中山之後戒艘於閩有鏡機子儼然造  
曰蓋聞甯俞竭力事主艱險不避人謂之愚汲黯數好  
直諫難感以非史稱其慙何故名癡豈有說邪癡人良  
久不言乃莞爾而笑曰僕鄙野之人僻陋無心胡敢當  
二賢也顧卽之時事驗乎物情名亦有自來矣且夫乘  
人鬪捷智者相傾而任理直前則愚之所以優於械也  
隨俗脂韋諛者相和而秉德持閑則慙之所以不為佞

也茲者傲寵靈以航異域其孰敢違彼此者避猶桎  
梏萌萌者但若康莊詭蔓飾隙遠脫冥翔見幾之作我  
則未遑是以觀者訝其辨之不早衆故譏其癡而無量  
耳鏡機子爽然自失曰若可謂安義命而篤於自守者  
也癡盍足病哉書云若濟巨川用汝作舟楫又獨不聞  
犯斗之奇邪第今時世日益澆已顧安所得植也者而  
乘之若惟單精畢力以造萬斛之舟意者其有濟乎於  
是癡人唯唯遂命工師求大木程之以有司督之以當

路閱彼閩山礪危黝靄前蔘輪茵連抱後矗天嶠間珂  
蔚若鄧林彌皋欏阜蔭谷蟠岑攢鬱叢駢朗晝盱瞋尊  
磊磊其上覆森落落而刺雲爾其考制掄材凌巒超壑  
移兵走檄滌數推巒松樟採於劒之津鐵力貿於嶺之  
表鉅不厭修細因遺小是斷是遷載堅載好凡既備矣  
大工斯肇於是覽易文思象吉儀工倂法虞姁考日力  
之程較費務之紀問軼事於故游鳩黎人以經始離朱  
督繩班輸削墨殊裁潤之時宜槩度稽於往牒定豐約

以執中酌文質以立則雕土豈效乎務相竅木用擴乎  
古哲為梁遠陋夫絳襜涉川無取於瑤槭扛臆參槐交  
籊合鼎穴牖梯舫副柁重底飛盧翟堂望之如宇其上  
則有形宮鏤像藻樞華棟璇函綺積香製瓊章錫衣命  
服皮弁纁裳玄冠盤綬玉佩鏘鏘犀金麟紫蒂烏斯皇  
繁纁冰紉緯羅束帛連烟之文獨繭之色凡夫取竭天  
產發輸人迹為九賦之所斂九式之所節者是用傳宣  
乎會極之門遠頒乎來王之國其次則有文樨莞蒨毛

蓆毼毼鉗缶七匙壽光水器蘭膏朱火貢燭金羊炊釜  
篋絨彝卣屏面甌甌陶素裹繡編連鹽酪鼓薪唾壺獸  
子綢杠絳絳組帷流蘇情旆旒悠以容喬羽旌騷殺其  
紛如材官畜用利械兼儲脩鍛延銳銛戈利矢佛郎鳥  
嘴賜夷勃盧大屈之弓綦衛之矢谿子之弩越女之劍  
龜蛇之旂烏隼之旗軍容翼翼豫戒不虞若乃弘舸巨  
艦非常可模抗指南之暉暉崇五樓之崢嶸運貨狄共  
鼓之巧使盡變化乎其中是故外閭內虛大人度也陽

行陰翕方壺鏡也畫鵷琢雲等威異也虬螭螭螭橈櫓  
擊也鷹麟梟獍力士從也嶠峯峰攢榮戟列也鳶翔鵠  
逸麾蓋張也蔽天翳日帆揚而縵移也流霞掣電銀黃  
飾而赭漆光也震霆轟輶輦鉦音革響也舞鸞律鸞韻鳥  
部蛙鈞天角抵續紛錯集者殊倆薄伎散襟期也若乃  
推驗天文審測風日星醫卜筮羽祝庖丁匠氏縫工調  
人司救象胥掌訝篆鏤丹青與夫吳歆蔡謳阮嘯孫吟  
曹詩劉飲秋爽嵇琴陶泓毛穎陳玄楮生儼然數客述

古刪今以至解難之丸杯肘之射棘猿之術雕龍之英  
靡不廣詢博取競爽撫能爾其大雖謝於馳馬制實邁  
於採菱庶幾御長風以利往責千里於寸陰乃若梁麗  
晉舶越舫蜀舫沙棠木蘭之稱青翰三翼之名方斯篋  
矣於是遊長年齊三老命先期以諏辰輒開舟而出塢  
士庶佇眙觀者如堵冠裳雜遝紛餞於祖導魚須負矢  
擎會候亭循舊矩割鰵鱖羞燂脯酌醴酬觴鳴金伐鼓  
揮絲競肉移宮換羽歡溢廝輿禮殷客主僕馬輻湊譬



風行雨散舉摻於南臺之潁爾乃揖讓辭筵慷慨升車  
祀天妃於厂石初縱輦於梅花臨萬頃之膠瀉杳莫窺  
其津涯覘五兩以為表指六合而為家仗皇威之遠庇  
託靈胥而自誇遂踈節而結旅忽輕舉以征遐高宇澹  
乎其若寂大塊恬然其不譁映流光以霽色照落景而  
俱嘉窮區沒渚而不見萬里藏岸其何遮泓渙信難測  
之於蠡蘇茫無足語之於鼉爾乃順桴鼓帆凌波驟舳  
不行而罔不至不疾而靡不速罔然若翔雲絕嶺之翼

條乎如馳隙遺風之足陋登仙以矜榮擬乘槎而彷彿  
此非海外之壯遊人世之奇矚也耶若乃陽侯磅礴以  
跳沫天吳激礪而鼓濤飛滂澌澌以相涵洪濶矻矻而  
互消轉天輪而頽戾迴地軸而爭撓駸駸乎嵩衡抗崔  
碨錯乎雷澍叫號急急泓泓則星河似覆澈澈淖淖則  
日月如搖篙工於是乎謹柁楫師於是乎弛稍當此之  
際末可如何雖馮虛以御風兮境非赤壁縱遺世而獨  
立兮心異東坡有時乎竦惴戰怖無日乎爽曠婆娑悅

千態以萬狀怵談笑而起戈須臾久於年歲瞬息慮乎  
風波有車馬行公無渡河繇斯以譚則知郭景純之所  
賦者特汨汨之見未習夫江漢之委輸也木玄虛之所  
云者乃想像之言猶未覩夫灝漾之實際也故嘗嗟徐  
衍之負石怪精衛之塞溟壯荊飛擒蛟而成氣賢夏禹  
眎龍其弗驚若乃陳茂拔劍事偶然耳海童邀路其誰  
忘情夫是以仰舟中主敬之程子悟遇風思過之管寧  
坐而待旦動與懼并行無轍迹止無所憑鬱鬱墨墨兮

衆心愒愒搖搖惺惺兮我頭岑岑逡巡數日乃始達於  
其境於是世子遣文武之臣駕雕輅驕驪坐組甲建  
旗常扈烏號翹干將羽騎飛蕤金戈耀鉉魁結左言之  
渠鏤膺鑽髮之行屬鸞驚捷舞蹈趨蹌前驅騁路盱眱  
自旁觀漢官之上儀咸輟咍以振踴慶千載之嘉會愈  
色澤而神竦亦有靡聞不來無見而拱周環羅列盤辟  
舉踵於是盛禮興樂供帳設乎皇華之庭風戒具而贊  
典紛呼嵩以祝齡傑侏兜離於焉俱集四夷迭奏昭德

之馨爾其尚之以金章加之以元服戴纓垂纓拖綬鳴  
玉變左衽之陋風襲中華之芳躅御纂組於公庭告先  
公於祠屋追養之禮殫受終之儀肅齊虎拜於部夷稱  
霞觴於宗族然後捧綸章留琳牘奎翰輝煌寶書雪煜  
爾乃稽首頓首颺言曰明明天子萬壽無疆者也於是  
命膳夫以大饗爰致敬於使臣滌濯孔嘉禮儀振振載  
之以醪醑設之以豆登豐之以饗餼介之以芳芬館舍  
之所問候緝御之所頻仍佳勝之所賞玩筐篚之所錯

陳淹藻景於二時篤隣好而常新卻衰蹄之厚魄堅不  
辱於遠人爾其鉅典既畢涉冬始歸瀆滉浮空旋亦如  
之傷心極目裊望僂拘風帷兮寒削月帳兮淒嚴慕玄  
英兮換節迅金素兮迎年狂瀾迴兮漸以遠駕飛航兮  
俄還安危值於所遇變幻殊乎目前而出坎履順殆有  
鼓歡聲而振天者矣緬惟鄉之所謂神藥形茹股弁背  
芒惴惴然而莫知所營者果虛邪實邪抑虛者舟邪實  
者我邪誰虛誰實誰我誰舟蓋譬猶空中之態夢中之

境物物皆遊物物皆觀耳彼有認水為海認陸為岸乃  
至認我為我卒相角逐而不已者得無障乎於是閩之  
耆老士大夫縉紳先生之徒罔不掀顏慰勞深喜其獲  
終王命以為邦國重也是時鏡機子亦在賀中顧獨出  
席盱衡而誥曰猗歟偉哉癡人固能蹈海哉昔者子路  
喜桴海之從聖人抑其好勇廣德執乘船之諫賢主嘉  
其直言禍福所倚幾希之間此招賈之文誦者悚焉若  
幸免於風波之危而克如期以竣事也詎非有相之道

歟第嘗聞之識治體者在脩文德以服遠尊中國者不  
割齊民以附夷茲緣蕞爾之小邦而乃奉先人之遺體  
幸魚龍之牙吻徒取彼重蒙竊惑焉癡人憮然而問曰  
客故習夫欲議乎儻若所諭適足以明其闇於全而掇  
乎瑣膠拘謏之忌而未覩其恢恢者矣何則忘九隩之  
藩屏而不以邊陲為襟帶者乃曲士之井矚也偷持祿  
之苟安而齷齪以避險崎者非達人之所壯觀也古之  
帝王陋偏據而規小恒宅中而圖大掩畧八極靡國弗



營既尊居乎神州之卓犖尤勤驚於鳥獸之外氓北出  
名師南馳信使輜車朱軒絡繹不絕樓船戈舫紛沓旁  
午然皆弗克遺顯號於後世傳土地於子孫方今聖明  
在宥感德旁皇九域謐如四封不聳遼絕之黨冠帶之  
倫樂貢效贄者蓋以億計琉球霑濡浸潤厯年滋多其  
奮濯泥滓比埒箕子之邦豈與夫烏滸狼狽屠婆縛婦  
竒肱反膝之首交脰長臂之種可同年而語哉客倘願  
聞若說請為左右揚摧而陳之夫琉球者上古所不能

化秦漢所不能從考之四隈則大荒之外測其封界則  
閩粵之東遠望蓬桑則曜靈晰逸晨霧晦蒙琴高影響  
而化幻犢配綽約以昌容旁睇島夷則朝鮮網絡越裳  
蔓引渤泥迢遞以乖閩蘇祿牢羅以互亘其花園則儼  
峰幽嶼秀起特出嵯峨降屈中州所慕其草木則石帆  
鳳尾紫絳綸組抗莖敷萼布濩皋丘其魚則有吞舟吐  
浪擁劔琵琶蜂目豺口狸斑雉軀奇形殊類胡可勝圖  
其蟲獸則雄螭扇鼇王珧海月繡螺綺貝土肉石華詭

桀出錄瓊異無書其禽鳥則爰居避風大鵬垂天英眸  
縹翠瀑瀟灑珠往來喧聒集若霞鋪其宮室則木無彫  
鏤土僅白盛重闔連闔去泰去甚歡會作門漏刻聽政  
殿曰奉神名義斯正迺設官僚授之以柄察度司刑耳  
目司問王親是崇亦有賜姓通事長史爰以將命茫茫  
羣醜此焉則勝海濱之風茲亦等競是故賦敝井田歷  
遵正朔橫盜無斬闕之慘墨吏免椎膚之虐攘難何有  
於軻書捕蛇不聞於柳說則閭閻樂業有餘嬉也醇醲

馴致憲度漸陳教亦崇乎釋氏詩頗似乎唐人羨聲名而遣學精奕數而絕倫歲時無須於視草髑髏豈聚於王城則傳誌綿邈自覆瓿也物貢所產器貢刀錫胡椒蘇木硫黃怪石降香櫟子豐苞重驛望日而趨間載而至則尉佗倨傲不足云也邇者東鯤即序西傾順軌交南懷化漠北跂指織路駢衢梯山櫟水獻名琛於殊隣出現琰於冥壘冀積壤崇膚赴全舉而稱臣入侍之輩相與充斥乎崇街之邸天子於是弘王者之無外撫胡

越之一家命鞬韉以掌音設黠任之舞曲以娛五戎之  
君以睦八荒之狄駕長策於智爽廣博施於疏逖常武  
輯嘽嘽之旅小戎埋麟麟之跡三五為之跨蹠八九為  
之韜軼禎符之所偉兆鴻鉅之所舄奕合在於此矣然  
則琉球雖遠豈其得而棄之四牡雖勞又惡可以己之  
且夫兼容并包者英辟之宏略也布德宣譽者臣子之  
急務也故漢皇馳域外之議博望不辭勤於月氏隋帝  
採殊方之俗朱寬久銜使於海國值斯之勤農夫輟耰

紅女寢機士馬創吮鉞而癰者老弱傷嚴鏃而蹂踐遐  
氓為之震竦黔首蒙被其難而邪行橫作侵犯邊境者  
猶不可殫紀矧朝廷純茂夷夏熙恬游原於邇陋泳沫  
於迴闊寰海之外有不喁喁嚮慕中國者則鯨人竊嗤  
之為士而不稱引帝德如之何其不叫呼於芒夫且僕  
以汎剽之弱幹荷郅隆之倬典方謂無異螳螂之臂客  
奈何獨以宗元之招賈者懼懼然相恐也已事而盤幸  
無談虎哉於是鏡機子柔氣汗辭而謝曰斯事體大固

膚淺所不能備也降階捧手欲讓而行癡人曰復位僕  
授而以航海之詩其辭曰於皇帝德暨四方兮中山請  
命厥惟常兮天子曰俞爾宜王兮錫以弁冕黼及裳兮  
赫赫詔敕使臣將兮布帆無恙神所襄兮一人有慶率  
土康兮本支百世熾而昌兮

御定歷代賦彙補遺卷十九



欽定四庫全書

御定歷代賦彙補遺卷二十

曠達

大游賦

有序

明祝允明

允明以宇宙之道於我而止矣渾鴻包之萬象條之三  
五聲構於其先宣尼總齊於其後君建為極臣成為業  
士治為學民遵為世隨其時也易曰拘係之乃從維之  
王用亨於西山允明時不自立身名隨人拘維將老而

神明中亮問學外廣有無之際三五宣尼之所營蓋嘗  
冥訪其間焉斯用亨之利也暇日叙之為大游賦可以  
垂語千載焉爾

夫何恢應之大人兮羌縱觀於域中柯柘櫪以為車兮  
畢妙制於輪工建六等以道遠兮職三材以行空既軒  
之以華轡兮又積中以堅軀招鈴且使附輿兮龔鹿而  
右從巾九圍而窮轅兮張章亥之有終跨四渤以修征  
兮隄華封以臨戎左賓暘於二桑兮右嚮晦於三春前

炎洲以玩鳥兮朔幽絃之夢夢耳鞬象其支朱兮胡旅  
瑣於蟲封悵皇盤之下繼兮中六圍而作宮命旋轉而  
內歸兮攬覆載之所有蕺蕭稂之被壞兮惹芳蘭之不  
茂喬隰榛與山樗兮斤文梓令速朽獷驅豹之犇犇兮  
貌麟虞之在囿叩鵠鵬之啾啁兮梧不集其鳳鳥夷高  
岸為深谷兮堀堞礫以為阜翦珞砦以圓榑兮童丘隅  
俾不萌晚洪河之橫怒兮恒襄陵而汨宇泓漫漶以突  
徙兮數失色而病漕懷神功之難續兮惋夏蹟之非舊

帶衡江而修截兮判二戒於左右聯南濱之百蠻兮蜚  
千泉而下湊亡晝夜而建築兮濫交注於揚藪潏散衍  
於三江兮赴伯若而為湫漢始涖而繼湮兮漬汜溢以  
妄走蹇重咽之中樞兮焉執咎於授受慨青災之歲成  
兮饘殫虐於吳畝驟沮洳而莫遣兮抃十千之維耦驅  
玄黃以高驤兮循中原之舊服畫州邑以星厠兮敞曠  
土之沃沃邈山川之遐隔兮空千里於一矚憶先王之  
位天兮經九井以為國掌地政于司馬兮詳同成而滄

涵樹萬里之基楨兮厚烝人之安宅固君民之比輔兮  
食無為之帝力厘諸聖之造述兮與世期而無數何秦  
孝之顛暴兮益衛鞅之薄刻始必懇以阡陌兮繼稅人  
而蕩濶乾坤之綱紀兮勢一剝而弗復艾因時以苟  
為兮僂彌古而偕極魁蒼黎之增增兮糝千百其品倫  
伊四業之各守兮剗百役以駿奔恫窮甯之顛隕兮愴  
情遊之猥囂終戕之以完賊兮搜豺獫而食人痛九夫  
以征穀兮餉凶餘俾悍淫捐田事而不男兮競逐末於

錢刀集千姦以為利兮網無卹於戚曹擗泉布而操壅  
兮靳濟物於一毛鄙遂縮於狡窟兮首驕戾於王侯工  
不度而作淫兮聊須庸於斤陶皇天生此元元兮惠司  
牧以大君建萬邦以諸侯兮賦官士而臣鄰寧一夫以  
非農兮而戴履於乾坤怵茲辰其何時兮農八一而僅  
存殮饑饉罔稽田兮畷曾弗得以食新鈞含氣於化育  
兮哀細人之特勤予既未穀於道邦兮吁釋錢鏹而被  
此鞶紳氣紆鬱而不解兮意周章以交馳違巖野而即

市兮求化理於官司闕訟堂之佻佻兮富萬子而榜笞  
大夫驟騁而憔悴兮不得知其所為輿胥五百桺千獠  
兮引羔豚而飲之檄翫礫而縶運兮格辰道而申齊士  
呻痺於餓輓兮伍病空於陴垂恂四方以晷晷兮甫焉  
得而驩熙操舠舳之蒙衝兮晨橫江而西濟扣曾城之  
九重兮闢皋應而疊五印天京之鼎立兮題絳闕以崇  
鶩欽萬域之攸則兮拱北樞之星附燄三殿以中嚴兮  
矗雙樓之夾輔閤椒闈之沈肅兮峻丹雘之複護列八

屯以周廬兮離千曹而張署啓巖閣以弘文兮宅大訓  
而稽古坐耆成以寅亮兮諧密勿以釐務藏法筵以尊  
師兮訪道揆於墳素倣明堂之法象兮裁靡代之踰矩  
近堯階之三尺兮削漢宇之萬戶廟四親以致享兮宮  
崢嶸於左祖右駢祠維太社兮同先稷而為伍毓儲聖  
於青禁兮昭英華於文武觀靡究於中祕兮規載考於  
庶府張五督以詰兵兮肅六官而開部廣通政而給諫  
兮謹臺察與大理太常典厥禋祔兮宗人掌其圖譜謚



翰苑之閑清兮都成均之緯臚守信玉於符臺兮顓筆  
削於史注欽天審其厯象兮大鴻傳其臚句光祿精夫  
玉食兮僕馬備其徒御條萬幾以緄襄兮錯群工而牙  
布沛周詳以章徹兮互責稽而隸備奕神祖之開業兮  
濯神宗而善遷為王賓以觀光兮遵大路而北轅厯揚  
徐而齊魯兮趨豐鎬於幽燕瞻帝居之際天兮服王心  
之所甄葵啓承之有道兮蓋同經而異權屹高皇之奠  
鼎兮介哉格乎淵算承乾休之凝注兮懍坤輿之饒瞻

執天德以守國兮豈徒防於天塹來百蠻之賓王兮會  
諸侯之覲獻岷文宗而上徙兮扼荒域之突踐居高屋  
以尊臨兮繞衆星而北面提四外於有截兮晷奉時之  
英見宣鴻仁之積洽兮熠光重而綦宣鱗百揆以具張  
兮敷皇極之中懸職工僚其偁偁兮稟成憲而周旋惟  
弛張之殊科兮深忤惑而眩悅殆愚固之莫憐兮緯有  
幾於攸先山臣銓草樹而牧麋鵲焉能覘其韋弦匪余  
位之所謀兮嘖奚煩於蕘言思沈潛而內求兮憺將歸

乎故苑繫佚足於管限兮擗鴻芬於枯簡聒萬夫之交  
鳴佩六編之神典探經邦之遠猶兮察庶務之奇變逮  
長古而周厯兮該千岐而綜練勵勵跡於滔天兮抽幽  
緒於獨繭殫精誠於至思兮肩无象而諧券情寃寃以  
條恍兮志強毅而逾鍊邁上升於至陽兮瞰皇人之垂  
見發祕鑰以授余兮發炙筠之玄篆吟微辭以啓悱兮  
歎樞栝之精雋忽不悟其所如今屑僊徊而僊旦宓閉  
闕而函光兮幸韜聞而滅見散神明於空靈兮泳皇冲

而教衍蕪萬化於芒機兮統三極於一貫識天人之燮  
成兮假幽明之互贊寤道器之相咸兮歸有亡於亡辯  
嶄厯聖之繼天兮討千文而同鍵杲曜靈於永宵兮齊  
受法於皇旻承皇命者犧兮始拜受此玄文九穹無言  
不愛道兮救地寶以龍呈枯五十而有五兮峙大道之  
靈根五相得而有合兮成變化以行鬼神觀穹文而祇  
理兮載取物與諸身爰立卦以生爻兮用四尚而成萬  
營居觀玩以既得兮勤假筮以質成橐萬化以鼓舞兮

漱千妙之幽源崇守位以財成兮纖出入之紘員洞生  
死於原返兮恣情狀於游魂冒承燾以彌綸兮貫異同於  
千門逮農軒而顓訥兮迭奉帝而詔人因龍鳥與草木  
兮依水火而風雲備物象以周世兮拂養本於生民代  
泰亨之何言兮睟神心於三墳司重黎於二正兮構貞  
厯之四分唐欽昊以授時兮宗厯象而三辰虞絜齊彼  
七政兮在璿璣而玉衡原欽明而被格兮址時雍而睦  
親粲重華之協帝兮終命位於升聞恭垂裳以無為兮

魏成功而莫名扈文命之神靈兮默取道於清玄奠山  
河而再造兮相天地於成平帝重錫用玄範兮誥龍龜  
而眎黻舒九章以列對兮似乃第之以類成遘殷周而  
密畀兮令箕武以載申揭建極之元則兮握天人之關  
鉗援神契以設教兮假泰卜於歸連眷岐豐以下鳳兮  
勅尼泗而來麟三聖演翼夫犧畫兮旦疏官而盡君宣  
羣經之自聖兮以時差而錯出孔完天以總聖兮萃整  
齊而立極道有本末而著微兮本微既其在易張末著

以長世兮諗禮樂之為急誠修身以御家兮弘治平於  
邦國作人備乎儀文兮宣和興於樂律稽疇典而作槩  
兮耿二史之布策放墳丘之眇綿兮綜唐文而姬歷晒  
嘉謨與大猷兮心偕事而錄實闕刪述以詔來兮立型  
模為永式體二篇以樹本兮用四典以示則張人綱以  
持世兮參成位而撰畢世惟遵而勿渝兮酬天心與聖  
職冥弗由以顛隲兮教乃廢而代汨聖何道而授若兮  
憑不位以敷德掇侯史以衛經兮勅予奪而作格尹天

明與王憲兮準賞刑于霜筆三代絕而世變究兮六冊  
具乃聖功訖理與事而偕著兮勸交懲焉縣植从為治  
以位天地兮違斯亂而乾坤熄孔既薊齊乎千牘兮攀  
綱要而綴集愼漢武之中興兮業躅孔而均績蒐獲僅  
於百篇兮訓終代而已給云理道其亡垠兮亦庸傷於  
多逸枿缺落於完籍兮咨三簡之不没何長息於逝者  
兮摩存緒而弗繹抒人情以合化兮亮聲詩之為特悲  
忽亡以永昧兮睥天聰於瑱塞販律天而襲地兮睨憲



章而祖述維天地之為大兮代天言而不息蒙遑克以  
辭贊兮伏奔走而靡斃迄作息而顯微兮咸由戶而出  
入考羣聖之攸作兮罔非天而自隲綏顯微之故庸兮  
覆相質而不忒普含生於兩間兮誰違天而已立感微  
賦之有聞兮慙白焚其鬢習拊脩辰而整寄兮矢乾乾  
以永訖裒千氏之攢叢兮助馳蹠而翔翼覽諸師之襲  
述兮披衆聖之膺臆苞鴻纖以條疏兮弗衷表而協一  
通泝漢以游唐兮惠畀受以綿密考靈無示乎度躔兮

瞽焉察夫天日被賢恩如命面兮等父仁而焉域咻後  
者之剽贅以沿茲兮吾將暴諸同心而未覲彼固自為  
至一兮謂精義之我集泯前後之夏業兮迹深局而固  
匿何斯今之膚臘兮愁捐甲而逐乙頰高皇之垂誥兮  
酌交久而無僻羣生曷靡靡乎顛視以奔時兮敢背祖  
而妄執寘聖謨賢教於公擯兮趯胡悍而胡逆疇鳴閭  
以一匡兮擲千載之流溺歲悠悠以隕頃兮洪章殆終  
乎罄滅聖乘時以施化兮賢隨時而成謀謾憂樂以行

違兮肆有用而亡求賤將五十未服政兮憮往日之藏  
修辰其息而亡悶兮警將放乎大游擁良謨以匱韞兮  
弁消搖以夷由孳千業於一函兮諒奚之而不優出衡  
宇而遵塗兮邁九躔以環流駿一日以千里兮快崇朝  
而九縣指河冀之上領兮應嵩洛之中壑紆三五之更  
都兮應玄樞而流建則乾元之用九兮敷海寓之疆甸  
大畫圻於方州兮細規土於井田烝哉先王之宅中兮  
憲井牧之攸便悼荒泯於周桀兮流一潰而亡返沈余

慮以構術兮據餘規於周彥籍民品以有定兮括肥壤而制限定永業於口授兮分授新以購羨縣百級以酌授兮人無食而不佃析贏田之南民兮易中原之隙衍每縮析而羨授兮足牛粒與舍广稽十秋而合貞兮廿有一而始斷既均田而畫地兮乃平賦之有漸都一郡之稅額兮總重輕之原版駕履畝以周旬兮核腴瘠之實算各斟酌以損益兮為新條而升殿第融紐以少均兮總無減於舊貫既不縮夫邦計兮庶重負之微嘆自

理郡乃通藩兮究海內而普徧明明后之牧宇兮更審  
地而制典租必當於壤力兮居中正而永奠憲東南之  
倚重兮最水利之難善偉高平之所列兮足紀綱夫羣  
辯滌宣歙之上流兮濬百瀆之聖淵宣三江之故道兮  
堅圍埤之防堰瘋白茆之海咽兮趙百川而吞嚙病雄  
潮之日至今挾塗沙而壅填非時挾而歲剔兮道奚出  
而不汙逖民勞而費穰兮後頻興而婁胥顧蘄疴以有  
瘳兮而却藥之瞑眩茲譚固諧理叶務兮又焉睹夫物

狀之繁變盤盪之有稱兮道中卑而表淺沮洳已膏腴  
兮欲夷之而且繼撤梁而斬荻兮揆亦非療疴之專驗  
循諸貌以發救兮又豈一端之已辦救術獨統夫宣防  
之二歸兮在交施而各殉穰衆瘞以叢軀兮繫曷弗周  
詳而異按長河滔滔而東駛兮歛怒嘯而橫濫夏跡漠  
其非故兮洸亦不恆於一荐術固率被其二歸兮亦與  
徙不超乎三撰相時宜以各庸兮厥亦斯其樞捷瘼征  
輸與允漕兮擬重陳而歎倦官斂民以藝賦兮優哉冗

或踰禮憾牛毛於先王兮又安得一切而屏置率土殫  
供正之願兮誰將不恭以沽戾憾縣肌之殄瘠兮而剔  
剗以無已嗟五材之給世兮出與沒宜相視彼濫耗而  
潛匱兮顧不與司存之計傷財既莫由斯兮責求之而  
獨委版十稔而審易兮徭一霜而均制四法良而情隱  
兮職競人以舉替業春陵而秋谷兮能錙察而銖諦切  
考心以仁公兮子殆少於偏蔽惻存用於智數兮神鉤  
察於聰慧拱默化以望孚兮蔑茲途之攸貴齊民生生

大校兮凡農商之歸二丁不足準兮田亦多昧田多聲  
而鮮實兮商態錯於內外惻賦與工之加患兮從或董  
之王吏征余駕而流觀兮覲懷生之遑遑明王厚下安  
宅兮類四族以為邦擐冠領於士儒兮曳尾夙於末商  
雖搏搏其異等兮貞萌萌之天良譏異世而殊道兮荐  
多門而分張繁胥徒之蜩蒸兮裂兵農而別行帳庸主  
之失馭兮魚不麗於王網昧邦本之逾寡兮縱冗雜而  
日昌閔四窮之無告兮懷三游之陸梁焚汨蠹之旭旭



兮鼠化虎而羊狼伎垂絕於人道兮曾何有於天常余  
蒿目而傍睨兮孰同淚之淋浪認同類之乳育兮寄食  
貨以為生古君王之子民兮廓一視而均情制生食與  
哀散兮擇羣生而不頃自彼君之繆術兮務姑息而倒  
衡算工車以為利兮崇婦臺之懷清商交農而雙厲兮  
末顛本於不平悲厯國之臨財兮每剥下以踰羸賊哉  
安石之聚斂兮詭市術於王經蔑均田以建本兮僥垢  
源於流激匹公姬於仲鞅兮企仁周於暴嬴俛后民曰

均利兮實胥戕以互黨敵既無克於迷復兮盡鮮取於  
無名走中原為治亂兮信珠玉之不脛持大道以生財  
兮皓千古之聖程慷慨斯之已憾兮日盡氣而涸精弗  
少拼以畝隸兮任喙酋以無生彼多遜於商末兮咎撝  
之以秦兵或徒食於釋老兮武饑賚於來庭髮何有於  
二教兮肫頑冠與穢髡唯玉食而海富兮烏有尚夫並  
耕鉅創至濫以冥輸兮時有在而靡懲憎彖子之乞人  
兮曩有政于周矜眇窶甲之微限兮如來者之日增壹

是蓄之為養兮俾溝壑之不盈簡夫夫少強力兮莽闕  
析而牽征資官殮以免乞兮婦給衣以妻軍洎流莩之  
還積兮勿客視而宅營至即團以為戶兮給廩飼以為  
恒移土邑以財輸兮吾特為之鼎鎗綏潛運以交拊兮  
一仁視而不病苟客者之過繁兮著吾廛為土岷憐汨  
治而戕天兮所鉅窳惟民螟攘哺嬰之微餐兮饁饕夫  
之已膾禽郊牲之肥腩兮養羣逸之蒼鷹委精純於塗  
泥兮虹邦產於一粵沓伍伍之蝮虺兮吾何舌以指稱

皇威無崇而必鑿兮震乾剛之旬旬凜岳壓以霜殺兮  
烈鉄鍼之馮凌慄神令之赫迅兮驚歟電而轟霆蒼旻  
賊而姦宄兮迨汨蠹之伯洵孰承天而法祖兮屠羣豕  
於鋒瞋荏苒之日繁兮欲屏戢之焉從聖訓止於不欲  
兮賢獄市以并容予其懲而猶異兮有殊初而同終矜  
狗鼠之偏餒兮怒獍梟之鞠凶先釋苛於斂徭兮遂嚴  
致於搜窮必宥過以刑故兮茲刑罰之為中坦大沛於  
僭竊兮劉姦殺之惡雄勿參差乃絕判兮皎冰凜而曦

融省潢池之披猖兮舉兩初以為萌懇原情以審勢兮  
慎蔽法而即戎戰反側於招綏兮肩凶渠於大蒙報怙  
虐以洪威兮與捐苗而芘螽須慎察而痛剗兮裨皇寧  
之仁公古王者之保邦兮作師旅於地水茹容民而畜  
衆兮田偕武而興制垂列國以交更兮之秦鞅而大戾  
后厥時以逾遠兮碎捫裂而為二醜顏波以下注兮寧  
能返乎涓瀝謾譚計之諸諸兮僉傷養於大費亮先作  
之叵復兮焚後述以多貳恒熙寧之保甲兮校拓跋而

猶寔微因損益以張規兮亦善謀之亞誠采材官於漢  
矩兮擘府兵於唐載肆長源之嘉尚兮擷稚圭之美議  
重時募而精教兮乃要切之至最竊虞夫謫戍之永終  
兮萃甲令而文致法常陸於滋久兮即三五而須異蠡  
匹夫之麗辟兮將不宥於十世豐廩養之長糜兮且望  
深而感細况懷土而迫宴兮繇竄迸以川瀆遂益之用  
核追兮煩鉤攝而部遞紛張官役徒以擾擾兮日馳驅  
於四海惟益薄而損厚兮宜亦矢謨而請裁萬幾數求

言以罷行兮曾不狂夫之為辜非犯忌而亂成兮謂效  
忠而襄治既未薦乎野謀兮數公仁而從事軫鄉思而  
甲蠟兮懲抽力而誅賄完家室以固志兮周粟帛以強  
體時番上以休容兮辟賂免之姦怠拔私徭之長癘兮  
裹侵拊之積穢故雖小而必刑兮兵無伍而不次挽千  
漏於逸果兮剔百門之宿滯力訓閱於往圖兮帶射蒐  
於儒吏揆張皇之弘要兮知亡踰乎簡帥祖仁義以為  
質兮厥禎之以勇智律經籍之典訓兮研歷史之成敗

厲瞿瞿之廉節兮，佗矯矯之直氣。勤步伐于苗獮兮，豈  
臨機而尋藝。推請論於司馬兮，命畀簡於辰辰。論必斷  
於援賊兮，斥浮聲於柔蕙。者授鉞而推轂兮，勿參之以  
弟子軍容。何為往監廁兮，嗟乎李趙之階厲將攜壺而  
債克兮。夫焉有於此，係覈諏研於績敗兮。畛賞罰之昭  
晰，彼屠降於殪良兮。兼粥級之作偽，殺戎昭而不弛兮。  
飛蕭斧於朱刈，毋狗免於援議兮。必姦絕而良勸，銷枉  
毀於貝錦兮。破滔謗於珠玑，熊虎毅其六師兮。魚鶴輯



其七萃務貌識而音別兮啓閑練而衷義懷強足與密  
代兮直寄命於童戲腰姦宄於中邦兮衛天險於荒裔  
林建國而所民兮虔有整於職方藩周飭於隍陴兮垂  
堅密於關梁崇函夏以立道兮隋百代之大防訐天王  
之集統兮越歷古以包囊樊封貳之峻截兮戒勤遠之  
否臧頻迴譯於異貢兮只收誠於來王肩包羞以餽女  
兮焉自殘而割疆無歲賂之坐雕兮有互市之交饋鏐  
皇代之神武兮跨振古而無雙曄神祖之清漠兮恢王

威而四張燭簡任於干城兮專權力而鷹揚弗牽肘於  
彼夫兮譴賊而姦妨為恤士之無實兮猶餽饑而搯吭  
眊衡瞎以八燭兮迴浩劫而未央愬遐萌之繹繹兮附  
九埏之芒芒徂日用而莫已兮串出入以隨陽寔亂衆  
而治寡兮喑樂短而憂長念蚩蚩之錯產兮不越茲以  
成邦愴美惡之必兼兮謫獨藉乎四良噴茲良之自植  
兮疎素履以獨守每自彼以戕陵兮竊帝彛之固有相  
斯辰之攸賴兮祗俊髦而暖叟眊既瘡夫不井兮晞三

法之或救尚稽實於征輸兮還微息於頻殍恐二子之  
終夢兮虞和緩之懷手蔚大氣之紆蟠兮壬胫靈而降  
秀顯蒼惠錫夫后王兮君成之乎黌校詳養射於夏殷  
兮具司徒於周教帝首出以廣運兮幾新邦之綱要舍  
賢能而安藉兮投碩材其安構渡長江以整旅兮倚干  
戈而詢道築禮賢以館僚兮聘名哲而探討及鴻圖之  
懋建兮夙教士以有造謬辟雍之湯湯兮溥侯類之浩  
浩範端嚴以恢綴兮思周微而懇到曰成賢以為期兮

意羅才而畢考藹思皇之濟濟兮聳周楨之廣效其在  
今之司存兮漸郵委而同眇眺儒堂而闕其兮凝沈沈  
之半沼籍束閣以停披兮琴絕絃而歌操填胄省之青  
衿兮日聚散而三造俾庠黌而率由兮亦胡辨於土偶  
之淫廟獨糜財以備聲兮疇鄙牖之為了漣法意於籛  
羊兮名將實而柄鑿崇術四而尤餘兮僅偏誦其邇小  
辨曾患乎先藝兮茲并藝而草草王國之克生生兮士  
不乏於覆幬業每樹於高遐兮履亦周於末杪彙駉牝

而如雲兮夫奚失得於樞臬嗟嗟吾黨之徒兮要賢聖  
以為期放四科而八行兮舉六藝而百家究學問以思  
辨兮邵仁行而寬居行成物以博濟兮卷善道而遯肥  
通天地人以稱儒兮贊化育於玄微國縣斯以求媾兮  
士執應而登之學由循以成士兮教率章以為師時與  
道有違行兮台詎隨以推移咿蝟蟬以自細兮胡不綸  
冶而沮奚初既育乃后舉兮儻科條於隋唐務拔萃於  
大公兮倍峻立其周防索理性於經術兮故全略於文

章方政事之需試兮策時宜以多方為程寧弗良盡度  
兮逐有司而淑涼來薄海之彥異兮危尺蠖之莫當予  
歷觸於禹穴兮胡鼓尤於鯨鱗迅賢豪之絕羣兮挺堂  
堂之贊皇麾時科而弗即兮喻龍媒之越行洵靈駕之  
不種兮聳萬夫之攸望鄙負羞於大人兮空趾壯而心  
長進退而前却兮澹胡為乎皇皇矚時髦之升庸兮耀  
勲華而頡頏倏霜蹄之超躐兮奚何有於王良羅目千  
以得一兮先民所為感傷睿謨固經於神運兮勿拘梏

於尋常彙小大以兼收兮悉明側而明揚膺百材於場  
師兮共京構於明堂掄梳楔以畢良兮粹豈獨於柱梁  
以周完而大壯兮庠備具而豈康害超等以異懸兮擢  
萬羽之孤鳳或科存而弗舉兮徒惋遺於衆芳為國惜  
才何人斯兮謨罄畢於駕鰲鱗甲乙於一班兮可百年  
之短長何斯據以卒躬兮信輕軒而弛張上既馮以升  
沉兮下亦自為摧抗坐獎日以淪胥兮叢偉望而縈妨  
尋世科之有無兮與第差之低昂鑒才出之先後兮及

卷舒之靜庸孰失得以饒不足兮孰隆汙之存亡爾其  
鋪觀而平角兮成效不其已彰繚廢位之崇卑兮環中  
外而周設尸脩政以立事兮並陳力而就列兮視昔以  
異宜兮沿與易而殊節祖建典以官士兮掄時宜而章  
別多率舊以監成兮掖無期之皇業勅蕪山之止位兮  
臣何知而嘖喋想拱職以綢繆兮熙庶績以咸凝唐虞  
和於朝兮膺元首而股肱昔秦人之憍亢兮儕百辟於  
倖倖後秦胥以沿洄兮且肅體而諧情貌隆坐接兮呼



莊君卿塗黃還命兮席前目征崇庠必詞兮揚抑告行  
皇王建設兮簡要以殷禧守官而罔道兮愚深昧於茲  
評王用道以命官兮官將道而為命蒙夫昧體而守支  
兮直置道以徇名逾追勢以滋顛兮偃蹇坼而拒撐交  
隔盤以無通兮不相謀以相能臣殊僚而一政兮肢運  
體而析形成左趾以將東兮引右拳而西脰各稱官而  
罔道兮烏不病殘以殞生宰萃士而一命兮粗因科而  
下上既蒞政以稽績兮復何初以為量年疇力良庸兮

才奚由於耆壯木不谷集而郊韡兮材將鳴寃於族匠  
非祖宗之盛心兮蹶後時之膠狀假三五揀斯方以舉  
錯兮當亦迷八四之直枉何莫峻登其異傑兮年序以  
饒夫尋丈僕筆工以醫傭兮濁銅駟而穀養汙王章以  
螳緣兮誨邪陵而貞降猥膏紕之流蔭兮偉漢疏之直  
諒縱故襲之未革兮又何弗涯於潸沈凡斯亦不同之  
貴兮非清波之都喪聲復侵夫無擇而無止兮益皇涂  
之決瀆聞方人之不暇兮識野求之無讓將循位以求

理兮匪稱人為標榜槩焉名襲而任別兮姑試徵二三  
之改尚公孤寵貴以年登兮未或倚其變亮寄餘甄於  
中相兮獨調衆而拯病天曹天下之才庾兮無遐遺而  
倖調懸鴻鑑以八照兮能簿號之故忘悲邦本寤固而  
易麗兮盱司徒之斯仗黨耗國之職思兮拱三緘而不  
創非睟瞠於竭澤兮哀株守以循罔祖議禮以作制兮  
網維設其貞廣豈科條之無俟兮虛百年而亡訪憚哉  
今之為政兮執邦刑以不爽懣死法不死情兮殲十九

之國命抗儒抑法誰為異家兮腐生迷而弗諱豈三尺  
難求於六籍兮對剡木而愴怳世生才以為士兮才弼  
辟以親民顯利用以成務兮幽履道以娛身靜庸兼維  
天之命兮士也允三才之珍偏有才而善用兮聊銷慚  
於宦塵守罷駕或不肖兮世何罹而尊親彼斗筭仕以  
為已兮用以學而為人何杖以為長兮后何藉而為臣  
戲余固艱夫欲議以畢偁兮亦謝此不尊而弗諒灰心  
亨而道塞兮且縣縣而斯往庖人不越乎尊俎兮陶斯

握其范模作者熱其亡為兮藏山澤而為癯余懷靡得  
於斯兮求茲人以為徒去城郭之垢氛兮嫁巖谷之鬱  
紆漫陟靡以豁廓兮積半綿而周遮岑峯嶺而誦鬼兮  
流澎湃以趨瀦儔競廢而騰伏兮連庚乙而凡几絢時  
縈以繪繡兮夏鶴狄之笙竽閨無人乎崖竇兮鞠幽求  
而單居未寢食於皇區兮安平康而樂兮綴聲籍於士  
舉兮足瀕申而猶邈哀君恩以無酬兮慚魯子之葵閨  
抽長沙之太息兮夢宣室之宵問數前聞於沈臆兮擬

婉約而莫盡功必一於天人兮理不隔於顯隱通千期  
於一契兮右皇靈於無泯夷明王之天造兮溼日中之  
豐運塞王猷以登咸兮丕重堯而襲舜學無恥於不穀  
兮尚席珍而玉韞若木不示乎世標兮神鳳無諧於塵  
韻天錦莫覓其機杼兮騰三籟而微引先素王之昭誨  
兮蓋二方以庸世謂初道而繼齊兮有政刑而德禮上  
焉恥且格兮亞且免而無恥明良誕務其至今烝率次  
以眢眢并殄殛以諄捐兮稔人注而時否政刑洵異夫

今古今緒言無庸以究齒德如毛而鮮舉兮禮司存其  
議擬假鴻濛之已渙兮佑作聖以君鄙大人後天而奉  
時兮惇五典以為紀搯三百以為經兮延三千而曲致  
摯元功於贊化兮全備體於唾涕措萬品之手足兮秩  
其紛而壹貳衆高沈而疆熒兮參蟲砥而柴虎竇一決  
以橫趨兮倏滔天而洗潰非因情以植則兮溘焉一而  
焉濟唏失德而信薄兮忍謝嘅於周史荒哉厖訐過乎  
標枝之不還兮將非禮而奚以禮陰作與生俱兮樂陽

來而儼啓聲容達而生神兮體音漸而死鬼肆犧媧迨  
姚姒兮極陰陽之文理裁衣裳以吹匏竹兮熙殊造而  
均旨柯出稊以為華兮毛傳皮而成美奏至治於雲池  
兮盡物性於宮徵邁盛皇之厭世兮寓大柄於遞位雜  
狡童與昏夫兮隕王彛於衷委姑何別於芻靈兮冠裾  
具而亡裏維禮綱於五端兮吉無先乎郊類莽欺天而  
侮聖兮軼輩申以傳會唐既蕪以並配兮宋逾淫於赦  
賚設有妄於祠衣兮位有汨於祧祀家庸行而不知兮



曾無違之能幾猥趙氏與北代兮游變夏而由裔底蒙  
古之遺醜兮騷增尤於九圍非穹皇之命聖兮疇撥亂  
以勇智祖一匡以再造兮駕百王而絕儷篤父子以孝  
慈兮協周文之敬止董百官以為朝兮截冠舄於首趾  
肅大別於掖壺兮斬收承之顛委固前星之繼明兮郁  
青坊於繼體羅九服以樹屏兮藩不億之其麗彊羣神  
之淫號兮叙百辟之規第推文質以四達兮布方策而  
漸被蓋郊廟之大儀兮時乃定於睿志馮三重而建制

兮曰非君其不議儻時命以下詢兮嚴立澤而敬事象  
雷豫以張樂兮薦祖考而配帝侑權輿以成德兮善武  
周之斯侯運昌期而情愒兮抑將順之能怠較民用於  
茲辰兮纔一合而百戾胥濫越以敗矩兮淪逐愆而鄰  
戲諫輕重之不權兮誑僭陋以交昧委筋力於無情兮  
擿貨財於空棄儼衣裳以臨莊兮況大君之斯侍端章  
甫如會同兮可非喪而去佩詎公庭之為燕兮褻長裘  
而蒞視噫人服之不衷兮集孽孽於卉毳玩窮狄之盈

觀兮惡衣妖之怪忌殺室舍以什四兮等衆歎於一散  
余既未聘乎上國兮望王懸而不耳過閭陌而或聆兮  
閔緇黃而倡伎亂一雅以萬鄭兮梟四戎而錯廁日作  
息以震驚兮駭律呂之焉寄噬六合以恒瘖兮聃九陔  
而悉贖八門張而何風兮四時行而何氣雅烏噪於晝  
日兮鸞驚蕭而不睨顧穹輿之定位兮礮風雷之鼓吹  
廡草木以有條兮噬蝨蟲之吟啖僑仲佐伯以尊王兮  
使其民而有義臣何望於今堯兮不觀興於茲禩王乘

龍以中立兮治六有於鑑  
韝根人綱而植初兮落有家  
以倣載簡姬姜之世貴兮  
愛任姒之微嗣連關雎之  
窈窕兮論鐘鼓而樂只貽  
銑鏐以前卻兮暢迭御於  
肫肫親郊禘以降乙兮儀  
姜嫄而第子擇周宗之妊  
傳兮拜后夔而教肄密緝  
熙於光明兮斲刁牙之侵  
嬖扞千邪而勿接兮賦萬  
幾而歷試隆親親於九族  
兮瓶章條而登殺鏡前塵  
而邁拔兮羞田恒之怙類  
歆實產以隸國兮歲坐觀  
其銍艾保堯睦於不踈兮  
供虞接於無匱彌

支蕃而土限兮司存寧能以無概維天王廟世以七兮  
實殷周之弘制茫皇古之靡究兮二代亦復宗異如姬  
周之二室兮固不祧而非次別太祖以特立兮三昭穆  
以對蒞乃一祖而二宗兮與四親而共備迨後王之復  
宗兮猶文武之不替迺七世以爲恒兮確古今之通誼  
於皇明之握符兮兼天涯而地際睢既廟於有七兮那  
千萬而莫計皇高文之巍巍兮擊百世之永繼丕承烈  
於歷葉兮列諸宗而裸餼撫大典之徐謨兮意冲襟之

不易續昭穆以無紊兮乃傳世之常系或頡頏而高卑  
兮儀馮從以位置匪今晨之攸聞兮法周知以為貴曩  
聖祖之不訓兮定儒臣之請禘賧趙氏之禘祖兮亦時  
禁於僖藝侯王儀之不襲兮曷由疑而永廢當肇統而  
慎始兮固宜存而不遂累重光以欽承兮將神靈之有  
俟盍懋建於崇典兮偁闕義而時起地時正而道合兮  
從心究於外內擊孝順而謹潔兮悃皇彝之極至洎儀  
章於物數兮比聲思而容綴載采采於羣神兮莫不審

於享祀開明堂以嚴父兮汗大號以施治  
蔭法宮之九成兮翼前朝而後市  
畫三接於康侯兮旦五徹於弼士  
更叔孫之絕貌兮整鉤陳之法衛  
惺明王之采章兮東鹵蹕於羣代  
被黃虞之法服兮禕日火於繡會  
貞與旂而邁簋兮盡生用之百器  
蒐古今以分宜兮區雅俗於殊裁  
革淫巧之吮靡兮絕邊陲之陋悖  
后謨臣以逮民兮宮刑廷而御海  
王有三以寡過兮杲風草之相逮  
常經總乎嘉吉兮與賓軍而喪祭  
周上下以用施兮惟日

見之為帛爛揖讓於交際兮或玄黃而牢醴纒目縷以  
條支兮陳更僕其焉既雖殊王之更轍兮儒亦紛其輶  
轉孕往辟之故秩兮窈三典之略在辭有單而已蔽兮  
道有一而知二迪在者以推施兮僅含氣而亡愧微列  
君之有作兮荷羣正之勤惠諦繩矩於銖權兮研節度  
於旒纛覓迷途於擿埴兮興證辨於張蜩置根枝以交  
參兮部優劣而互採鑠開元暨君卿兮亦司馬而元晦  
頽今昔而時措兮斯數家之為懿按三經以疏繪兮又



莫茂於先輩煥堯文於神祖兮大集成而班賜茁楨柢  
於恒性兮順條柯於日履申邦教之森騰兮補未充之  
伐細鋪遐邇以折裁兮要覲時以爲揆剋昏狂之僭濫  
兮輔眇忽之不暨匡以居正之名兮章以昭明之軌來  
九苞以均儀兮諄相鼠之遄死遵王度於截防兮允蒲  
盧之可企觀天文以察時兮責順叙而貞明昊穹率而  
西沒兮儀娥錯以東行訂俱右之臆談兮淵鑒破乎迂  
冥檢班陳之分土兮何壞局而霄弘嘗有貳於分星兮

亦未究其諦精夏曷不中近天心兮三隅偏闊而空宏  
經舍輟以環轂兮二十有八而咸趨中謂狄雖曠而邊  
裔兮分廁占於規零豈理果能御罷兮乃因理而不通  
測遲留與伏逆兮校客流與無名綜天官於靈憲兮固  
休咎之分徵珠璧信其有期兮同上下而清平氣多符  
而罕戾兮翼儼修之有行矧氣否以變沴兮漠不省其  
遑寧皚歷代之愆臣兮還治歷以齊政邈都閎而下之  
兮孔難刺於一定監往故而聿造兮大統於斯而為令

彙羣造以折衷兮改月行於守敬免久紐之必謫兮徵  
良師以時訂曩授時之可採兮祀四十而已病巖緹室  
以候氣兮莊修表以測景於製律以治物兮鍾一正而  
萬應既禮達而政修兮馴刑清而世康愷人蕃而物條  
兮曼至和以充盈王中正以居心兮氣驩通于蒼黃玉  
燭所熹乎泰宇兮負嘉來而八風平禔仁浹而功振兮  
烏沒世而不忘騰風詩以交宣兮鏗作樂以薦享本吹  
簫以造律兮擢五要以為綱緒審泰以定管兮正九寸

之黃鍾各三分以損益分於相生以旋宮均七始以爲  
調分八十四而成章間者闕焉夔曠之無作分術布策  
而炳明渺杜荀之神解分代已希而非亡謹述者之悟  
諝分議驤烟以詰攘遴執隨而成渝分非數詞之已彰  
肇和聲以製器分倚度曲而綴行摘竊眇於純和分拔  
絃密於腐常衍歆神而賓德分戡哇鄭之猥厲嗟金元  
之述嬪分聲後國而猶荒沸俗躁而胡疾分且將裁而  
未遑吮斯音之么末分爾猶昧其條章驟杭都其何響

兮鬼嘯啼於晝梁鏜吾聲之有作兮融噍殺而鏗鏘頌  
皇烈於神明兮適今時之豫昌延鴻碩以倡構兮逝效  
工於更張即二裔之俗譜兮鑄昌時以雄莊給比閭之  
小奏兮婁備部於下堂猗帝德之夏殷兮般穆穆而鏜  
鏜誕先天之下兮至海隅之蒼生吊幽明以效答兮郤  
六幕而同風遐休嘉之弗呈兮抑玄文之或爽五耀潤  
於乾垣兮五財理於坤軫河岳位而激靜兮四類效其  
靈命萬祗嚴以衛釐兮魑魍伏而不肯民於變以時雍

今同虞方而風動蓐王區之械櫟兮天命生於熙朝皇  
契道以盡受兮非行違之異標器必蘊於微庸兮志須  
允於冲遠愚幸賦此玄玄兮愕夫人之宅操潛茲未之  
或閱兮令達又胡以宣驕已焉哉俗以勢而成世兮勢  
以時而自然溼時勢以太順兮存茲道以為棟森三端  
而翕張兮亘宇宙以推遷仰惠銜生於黔雷兮肯棄受  
于崇園飛元靈於泰虛兮收萬實于甫田控大一以貫  
之兮艘有無而齊詮撫羣有以日用兮秉神根之淵淵

羨諸子之敏修兮品交通而互全兆流歸而皆海兮億  
管瞰而均天微無拂於風鳥兮碎或攝於筵簞躡太一  
於九宮兮丙離章於太玄機條條於木獸兮數斤斤於  
銅丸灼華降之非異兮易菽兵之戔戔抱鴻通以款塞  
兮疾細滯而浮漫悉蟲沙而願遂兮當豺獫而不難惟  
無欺與至慈兮所不負於高昊坦詔鬼而交神兮直衣  
焜而踐川譔凡夫之妄顛兮北二子以睽兮謂殊儒而  
端異兮繆世教而為三昔柱下用表而存中兮師友於

我文宣竺尊儲性道之本兮其何事於囂譌千門萬室  
橫六內兮朝蜚波而夕煙印既尚此皇符兮炬百幽而  
一焱戚城隍之湫仄兮救羣蟲之所廬解胡蹤於黔垢  
兮翺洪翼於蒼墟榜脩雲以為輶結浩氣以為輿並三  
辰以循紀兮極八遐而同區暖晞髮於若搏兮夕留輶  
乎融都蓐收前以道轅兮誥玄冥使迎余召飛廉以興  
飈兮翬屏翳而滌塗氛侵伏而淑朗兮恣余襟之所如  
翫羣生之起滅兮觀兩儀之渙儲朋山河以結解兮實



曜宿而盈虛銜紫皇之默詔兮偕金女而同趨統父母  
於元氣兮或天神而一衢問日月其何紀兮咤死生而  
焉殊真一性以長覺兮去六凡而不居大哉余游奚適  
而奚來兮醫焉往而不歸與

# 大觀賦

明  
洪翼聖

觀象易垂醜闕取大局曲寥廓可由神會蓋蚍蜉觀穴  
鵜鴟觀淑螻蛄觀山夏蟲觀暑若夫鴻鵠竦翅而扛雲  
大鵬回颺而瞥夫則觀夫垠鏐下盡乎山川觀大人之

遐眺兮何聊浪而無涯放心意於挺絃兮廓包羅而靡  
遮爾其耳目則曜靈舒望炯晃乾坤東燭煬谷西覲崑  
崙攬一世而無封奚啻乎鍾山之燭龍爾其威社則列  
缺霹靂砰礧礧畢沱灑潤霖霖汪汪發動於微眇而  
焱厲熒朗乎八荒爾其宮室則天為宇兮地為鋪叱雄  
虹兮為梁斲若木兮為桴削五嶽兮作柱畧神州兮按  
圖巨靈兮司繩黃義兮執樞彼柏梁建章駘盪別風長  
楊五柞之屬不啻蟻之垤而山之隅爾其園林則南溟

之池天漢之槎瀛洲方丈之勝大椿冥靈之華鸞鳥兮  
女牀騰黃兮渥洼玉醴兮靈沼木禾兮異花靡不侔池  
櫬桅淪陸離其布如雲而其爛如霞灞其寶藏則瑛  
發藍田璧滿荆山綠碧穀玉駁犖璘玕與夫蜀江之錦  
浦海之珠城玳瑁玫瑰球琳之屬莫不霍繹紛泊於  
山庾水府之間於是居則燦閬遊則逍遙疇夾轂兮攝  
提孰啓路兮招搖飲余馬於碧漢兮綵余韞於帝宮揖  
金天之少皞兮覲南陸之祝融猗蒼龍與玄武兮共遨

遊乎青空隘天地之為籠兮歛出籠而觀外悟有形之  
為樊兮奄跳樊而縱旆於是回旃反轡擊節而歌曰流  
覽六虛兮渾無端涉躡濛兮顥氣攢揭來蕩蕩兮霄  
際看遺世兮返混沌抱元兮揚巨瀾此之謂神道此之  
謂大觀

閒居賦

有序

明  
魏學伊

余自解識字即志四方年既二十亦云壯矣乃足跡不  
能徧千里而又客處以為常夫古人閉門讀書則有仲

舒遨遊山川則有子長悠悠閒居余何為者也賦曰

空庭晝永恬浪風驕秋深多慨歲暮無聊撫几席之優  
游覽林樹之招搖感暇日之非易聊攬物而逍遙其居  
則柴門晃朗茨宇廢蕪盤渦浴鴨古壁纏蛛草芳木榮  
羅生室隅其木則綠榆楊英青杉絳桃桂枝梅幹詘曲  
嵯嶢其草則苔碧蘿翠蘓紫苔黃淡竹青青菰蒲蒼蒼  
其花卉則西靨媚蕊莖苗清芬芙蓉幽麗叢菊繽紛其  
書則陸藏鄴架出數米船蟲註鳥譯魚貫蛇連藍本麟

史草難孤禪其朋傳則踰蹊婆娑晤對汝我鎮日靜嬉  
竟夕匡坐灑落斯臧方毅亦可其童僕則蓬頭突鬢短  
衫蒙戎冥心塞舌僣屹倥傯漏深秉燭睡眠朦朧其樂  
而遊則野袍翩翩駕言登高漪痕新長村郭輕刁歸來  
揚揚鼓簧舞翻其風雨則輯楮糊窓展冊獨觀豁今日  
曠寂兮意殫思入而親春風蕙蘭其雪則徧啓軒廡擁  
爐兀坐颺轉霰迴衝憐撼座快劇欲狂憬頑豎情其月  
則天空儼水階白疑霜樹影蕭疎中庭四望偃息不能

長夜彷徨其攤辭則幼眇竊闚顯出涉趣執藉寒梢機  
隨驚兔時采菊悠然時天潢倒注其飲則量齊玉局興  
邁無功悞浮蕉葉勇澗荷筒顏然獨酣茅閣從容其歌  
則忼慨激昂馮弔曩事伉直逢顛佞諛獲志朗嘯當哭  
徘徊不置其勸而夢則予於徐違風就日娛覽屢遷  
任彼紆疾或平濤滴漣或層崑嵒嶮或淋瀝甌甬或從  
橫琤琕或青黎軟爛或赤松授術或結趺少林或攜登  
太室其蘧蘧然覺也則短檐不掃敗樗數椽鄰雞樹烏

景物依然於是悄然作而歎曰雲移莎岬天覆晴川矯  
首遐眺風光去年勝衣若干淹滯江南遲遲長日誠何  
以堪

棲清賦

有序

明  
祝允明

茗施公悅民隱君子也身慮並清為居以棲署曰棲清  
乃為賦云

何人區之寡潔乃靈駕之艱寄睇城市兮湫煩將褰裾  
而高逝無更從於彭咸意先廬之不弊乃惟歸安之邑



眷茲大姥之墩梓桑樂鄉粉榆故門坦素履離喧羣抱  
玄璞揚幽芬高尚其志驩然願言集百勝以為居宮一  
畝而安儒廊以芳園疏為流渠山石犂确草木扶疎韻  
爭高兮梅竹陰合秀兮蕉梧級覽為梁累碩為島奇樸  
海外異拔霄表鶴鳴於臯魚在在藻龜扶莖以巢連鹿  
交角而眠草若夫覲堂崇廡重棟連楹臨以層臺敞以  
廣庭燠以曲館涼以丘亭左琴右書前壺後觥鐘磬在  
懸戶牖有銘於是息廣胖凝虛靈褫垢滓游神明偃仰

至玄消搖泰冥燭造化之樞灼萬物之情玩四聖之幽  
文研六編之遺經尋曼倩十洲之詮覽伯禹山海之形  
遞鐘一鼓商歌數賡烟霞為之飛動日月助其光晶既  
對聖賢亦多賓客玉塵時揮庖言日出式燕且歌或射  
與奕客曰美哉掌人之棲乎濁穢遠善哉掌人之清乎  
中外一請薦署曰棲清庶斯名之賓實客有太原祝生  
嘉其旨因稱曰印非正則兮皆濁而卜居印非湏無兮  
棄馬而違邦泳黃生之平陂濯孺子之滄浪睇廉立之

伯夷符得一之昊蒼稱既題之屋牆以揚先生之耿光也

歸來賦

明王偉

歸去來兮山中樂兮胡不歸予有草堂兮乃在青山之麓黃溪之湄山如屏以面列水縈帶而四圍白茅潔兮廕宇蒼松樛兮承楣不磨不雕丹堊靡施前堂薄飾兮以待賓祭之所後樓稍崇兮蓋備水潦之不時別掃一室高明靜虛竹几藤牀左琴右書澹泊無營危坐跼蹐

汎有輕舟陸有輶輿聽鶯兮策杖看竹兮攜壺我有兄弟如埴如甌燕嬉為朋言論為師一月再見怡怡愉愉居民樸野土壤沃肥菌如芝而無毒茶味甘而可茹橘經霜而不酢蔗得火而成飴瓜美比北土粳長敵東吳魚多鰕鯉果饒柿棣自耕而食自織而衣為農夫以卒歲無鬼責與人非其樂也如此吾胡為不歸譬彼燕會醉飽則退矧三爵之既過察主色之不在苟貪戀以遲疑將招尤而連罪甘窮約以終身縱寒餓而無悔嗟夫

天地無窮兮民生倏忽獨抱耿耿兮媿修名之未立徒  
美食而華裾亦何貴於萬物幸吾兄之耳提面有見於  
髣髴苟朝聞而不疑雖夕斃其何恤誓餘生之匪懈冀  
此願之可畢

北窓八詠賦

明  
楊守陳

有媿一人居瀟之陽耕道獵德枕書籍經若渥洼之神  
駿欲籛雲而上征爰思采蘭之什用歌考槃之章年冉  
冉而流邁髮種種而侵霜鳳毛縹而橫厲鸞詒燦其流

光跨九達之大道闕數仞之高堂潭潭渠渠噲噲奕奕  
若霧瀟而雲浮如翬飛而鳥革宛虹拖於穹棟飛霞灼  
於修楣鬱山川於外戶蒲竹樹於中墀有窓豁如爰在  
於背鬼剗神剗撤部祛蔽惟白間而列錢匪交疏而結  
綺法陰陽以成樞順朝昏而啓閉向地祇玄武之方處  
河圖一六之位納廣莫之高風挹沆瀣之正氣可以招  
黑帝眺塞罕望恒山瞻北極此陶淵明所嘗棲遲而偃  
息者也爾其月榭鳴琴雪窓玩易萍沼觀魚松亭放鶴

則玉軫映九霄之璧韋編沾六出之花金鱗躍兮綠鬣  
散縞衣翥兮翠幢斜拉伸淹於汾亭招康節於洛社縱  
目濠梁之濱開籠孤山之下於以歌太始而鼓淳風玩  
先天而探太極識高下之相因見飛潛之各適豈比夫  
操求凰而漁色卜儂句而成欺忤諫玩棠色之矢臨刑  
歎華亭之嘆者哉至若隔竹敲棋倚花搗藥杏園春香  
菊屏秋色則楸屏浮翠雲之影玉杵映紅霞之輝錦苞  
折兮惠風起金英晃兮濃露晞伍四皓於巴園煉九還

於蓬島步逐董林之仙飲從甘谷之老於以適閒情而  
消永日却痼疾而引修齡驗陽春之和氣結晚節之香  
盟豈比夫睹金錢而諱輸飲瑤漿而生感催花鳴羯鼓  
之喧餐英葬魚腹之險者哉凡此皆北窓之樂衆美畢  
具不但清風徐來永日無暑卧五柳之陰得一琴之趣  
而已世有若九方皋之相馬者得天機於驪黃牝牡之  
外則瀘川之鄉即柴桑之里也吾方見地平而天成鳳  
儀而獸舞思為夔龍稷契以為堯舜之輔語諸義皇上



人猶隔塵凡而睇洞府也

湖山雅趣賦

明 陳獻章

丙戌之秋余策杖自南海循庾關而北涉彭蠡過匡廬  
之下復取道蕭山泝桐江艤舟望天台峯入杭觀於西  
湖所過之地盼高山之漠漠涉驚波之漫漫放浪形骸  
之外俯仰宇宙之間當其境與心融時與意會悠然而  
適泰然而安物我於是乎兩忘生死烏得而相干亦一  
時之壯遊也迨夫足涉橋門臂交羣彥撤百氏之藩籬

啟六經之關鍵於焉優游於焉收歛靈臺洞虛一塵不染浮華盡剥真實乃見鼓瑟鳴琴一回一點氣蘊春風之和心游太古之面其自得之樂亦無涯也出而觀夫通衢浮埃之濛濛游氣之冥冥俗物之茫茫人心之膠膠曾不足以獻其一哂而況於權爐大熾勢波滔天賓客慶集車馬駢填得志者揚揚驕人於白日失志者戚戚伺夜而乞憐若此者吾哀其為人也嗟夫富貴非樂湖山為樂湖山雖樂孰若自得者之無愧怍哉客有張

璫者聞余言拂衣而起擊節而歌曰屈伸榮辱自去來  
外物於我何有哉爭如一笑解其縛脫屣人間有真樂  
余欲止而告之竟去不復還噫斯人天隨子之徒與振  
衣千仞岡濯足萬里流微斯人誰將與儔


東山賦

宋楊簡

吾之日用何如哉如東山之曉色蒼茫無際不可攬取  
其間雲氣隱見陽輝榮發霞舒金錦愈變而愈奇雲拖  
玉龍出沒天矯于萬峯羣翠之間可觀可駭而須臾忽

化千態萬狀莫繪莫畫又如江上之秋光清空爽明若  
甚近也而不可執若遠也而不可追而及清露濡之霜  
月炯之而無所損無所益又如松間之溪聲玲玲其鳴  
其音甚清的然可目聽而聞而不得夫音之形又如巖  
前之月明其潔如玉其流光凝止若可以斂而掬入松  
為松入竹為竹隨物賦形而終不得其機軸此豈吾之  
所私有獨妙獨化他人不得而與哉舉遐邇通萬古夫  
孰者之不然惟昏明之不齊是非之迭出所以有知有

不知有協於極於不極粒我烝民莫非爾極孰謂我日用而非極乎孰謂吾日用而可以知可以識乎孔子曰哀樂相生明目而視之不可得而見也傾耳而聽之不可得而聞也孰謂吾日用而可以見而可以聞乎偶書如右他日名之曰東山賦或疑當名日用賦應之曰如此問不惟不識東山亦不識日用慶元丙辰仲秋書於石魚竹房



御定歷代賦彙補遺卷二十